

河南府志

ル 5  
1546  
23



1546  
23

河南府志卷之一百一

藝文志二十五

詩六 七律

唐

石淙 太子時作

中宗

三陽本是標靈紀二室由來獨擅名霞衣霞錦千般狀雲峰  
雲岫百重生水炫珠光遇泉客巖懸石鏡厭山精永願乾坤  
符睿算長居膝下屬歡情 石刻

石淙 相王時作

睿宗

奇峰嶷嶙箕山北秀嶠昭嶢嵩鎮南地首地肺何曾擬天

天台倍覺慙樹影蒙龍鄣壘岫波深洶湧落懸潭缺願紫宸  
居得一永欣丹旻御通三石刻

夏日嵩山石淙應制

狄仁傑

宸暉降望金輿轉仙路崢嶸碧洞幽羽仗遙迎鸞鶴駕帷宮  
直坐鳳麟洲飛泉灑液恒疑雨密樹含涼鎮似秋老臣預陪  
元圃宴餘年方共赤松遊石刻臣作  
惠年作率

石淙

李嶠

羽蓋龍旗下絕冥蘭除薜幄坐雲扃鳥和百籟疑調管花發  
千巖似畫屏金竈浮煙朝漠漠石牀寒水夜泠泠自然碧洞  
窺仙境何必丹印是福庭石刻

石淙

姚元崇

二室三塗光地險均霜揆日處天中石泉石鏡恒留月山鳥  
山花競逐風周王久謝瑤池賞漢主懸慙玉樹宮別有祥煙  
伴佳氣能隨輕輦共蔥蔥石刻地作壘日  
作月作匝

石淙

蘇味道

瑤輿藻衛擁千官仙洞靈谿訪九丹隱曖源花迤近路參差  
嶺竹掃危壇重崖對聳霞文駁瀑水交飛雨氣寒日落宸襟  
有餘興裴回周懼駐歸鑿石刻瀑作  
曝日作

石淙

崔融

洞口仙巖類削成泉香石冷畫含清龍旗畫月中天下鳳管

披雲此地迎樹作帷屏陽景翳芝如宮闕夏涼生今朝出豫  
臨元圃明日陪遊向赤城石刻

石淙

閻朝隱

金臺隱隱陵黃道玉輦亭亭下絳霧千種岡巒千種樹一重  
巖壑一重雲花落風吹紅的歷藤垂日晃綠葢葢五百里內  
賢人聚願陪閭闔侍天文石刻日作  
人作至

石淙

徐彥伯

碧淀紅淙崿嶂間淙嵌洑岨洑成灣琪樹璇娟花未落銀芝  
窟咤露初還八風行殿開仙榜七景飛輿下石關張葛席雲  
平圃讎焜煌金記蘊名山石刻初

石淙

薛曜

玉洞幽尋更是天朱霞綠景鎮韶年飛花藉藉迷行路嘯鳥  
遙遙作管弦霧隱長林成翠幄風吹細雨即虹泉此中碧酒  
恒參聖浪道崑山別有仙石刻年作  
季聖作壘

石淙

楊敬述

山中別有神仙地屈曲幽深碧澗垂巖前暫駐黃金輦席上  
還飛白玉卮遠近風泉俱合雜高低雲石共參差林壑偏能  
留睿賞長天莫遽下丹曦石刻

石淙

于季子

九旗雲布臨嵩室萬騎星陳集潁川瑞液含滋登禹膳飛流

薦響入虞弦山扉野徑朝花積帳殿帷宮夏葉連微臣獻壽  
迎千壽願奉堯年億萬年

石刻星作  
○臣作思

石淙

沈佺期

金輿旦下綠雲衢綵殿晴臨碧澗隅溪水泠泠雜行漏巖煙  
片片繞香爐仙人六膳調神鼎玉女三漿捧帝壺自惜汾陽  
紆道駕何如太室覽真圖

石刻

從幸香山寺應制

沈佺期

南山奕奕通丹禁北闕峩峩連翠雲嶺上樓臺千地起城中  
鐘鼓四天聞旃檀曉閣金輿度鸚鵡晴林采賤分願以醍醐  
參聖酒還將祇苑當秋汾

英華

三陽宮石淙侍宴應制

宋之問

離宮秘苑勝瀛洲別有仙人洞壑幽崑邊樹色含風冷石上  
泉聲帶雨秋鳥向歌筵來度曲雲依帳殿結為樓微臣昔忝  
方明御今日還陪八駿遊

按石淙石刻無宋之問詩選本  
譌作同遊失攷今據英華正之

送方尊師歸嵩山

王維

仙官欲往九龍潭旄節朱幡倚石龕山壓天中半天上洞穿  
江底出江南瀑布杉松常帶雨夕陽蒼翠忽成嵐借問迎來  
雙白鶴已曾衡嶽送蘇耽

石丞  
集

過乘如禪師蕭居士嵩邱蘭若

王維

無着天親弟與兄嵩邱蘭若一峰晴食隨鳴磬巢鳥下行踏

空林落葉聲迸水定侵香案濕雨花應共石牀平深洞長松  
何所有儼然天竺古先生同上

送嚴維尉河南

錢起

蕙葉青青花亂開少年趨府下蓬萊甘泉未獻揚雄賦吏道  
何勞賈誼才征陌獨愁飛蓋遠離筵只惜暝鐘催欲知別後  
相思處願植瓊枝向栢臺英華

題嵩陽焦道士石壁

錢起

三峯花畔碧堂懸錦里真人此得仙玉體纔飛西蜀雨霓裳  
欲向大羅天彩雲不散燒丹竈白鹿時藏種玉田幸入桃源  
因去世方期丹訣一延年英華

謁許由廟

錢起

故向箕山訪許由林泉物外自清幽松上挂瓢枝幾變石間  
洗耳水空流綠苔唯見遮三徑青史空傳謝九州緬想古人  
增歎惜威然雲樹滿巖秋文粹

訓暢當尋嵩岳麻道士見寄

盧綸

聞逐樵夫閑看棋忽逢人世是秦時開雲種玉嫌山淺渡海  
傳書怪鶴遲陰洞石牀微有字古壇松樹半無枝煩君遠示  
青囊錄願得相從一問師英華

上陽宮

王建

上陽花木不曾秋洛水穿宮處處流畫閣紅樓宮女笑玉簫

金管路人愁幔城入澗  
橙花發玉葦登山桂葉稠  
會讀列仙王母傳  
九天未勝此中遊全唐詩

春題龍門香山寺

武元衡

衆香天上梵仙宮  
鐘磬寥寥半碧空  
清景乍開松嶺月  
亂流長響石樓風  
山河杳映春雲外  
城闕參差茂樹中  
欲盡出尋那可得  
三千世界本無窮同上

洛中寺北樓見賀監書題詩

劉禹錫

高樓賀監昔曾登  
壁上筆蹤龍虎騰  
中國書流尚皇家  
北朝文士重徐陵  
偶因獨見空驚目  
恨不同時便伏膺  
唯恐塵埃轉磨滅  
再三珍重囑山僧隨川集

洛中初冬拜表有懷上京故人

劉禹錫

鳳樓南面控三條  
拜表郎官早渡橋  
清洛曉光鋪碧簾  
上陽霜葉剪紅綃  
省門簪組初成列  
雲路鴛鴦想退朝  
寄謝慇懃九天侶  
搶榆水擊各逍遙同上

自左馮歸洛下酬樂天兼呈裴令公

劉禹錫

新恩通籍在龍樓  
分務神都近舊邱  
自有園公紫芝侶  
仍追少傅赤松遊  
華林霜葉紅霞晚  
伊水晴光碧玉秋  
更接東山文酒會  
始知江左未風流同上

和樂天洛下雪中

劉禹錫

洛城無事足杯盤  
風雪相和歲欲闌  
樹上因依見寒鳥  
坐中

收拾盡閑官笙歌要請頻何爽笑語忘機拙更歡遙想兔園  
今日會瓊林滿眼映旂竿同上

寄陸渾趙明府

張籍

與君學省同官處常日相隨說道情新作陸渾山縣長早知  
三禮甲科名郭中時有仙人住城內應多藥草生公事稀疏  
來客少無妨著屐獨閑行司業集

初到洛下閑遊

白居易

漢庭重少身宜退洛下閑居迹可逃趨伴入朝應老醜尋春  
放醉尚粗豪詩攜綵紙新裝卷酒典緋花舊賜袍曾在東方  
千騎上至今躑躅馬頭長慶集

從龍潭寺至少林寺題贈同遊者

白居易

山屐田衣六七賢寒芳蹋翠弄潺湲九龍潭月落杯酒三品  
松風飄管弦強健且宜遊勝地清涼不覺過炎天始知駕鶴  
乘雲外別有逍遙地上仙

嵩陽觀夜奏霓裳

白居易

開元遺曲自淒涼況近秋天調是商愛者誰人唯白尹奏時  
何處在嵩陽迴臨山月聲彌怨散入松風韻更長子晉少姨  
聞定怪人間亦便有霓裳

過元家履信宅

白居易

雞犬喪家分散後林園失主寂寥時落花不語空辭樹流水



河南府志 卷之三十一  
無情自入池風蕩醜船初破漏雨淋歌閣欲傾欹前庭後院  
傷心事唯是春風秋月知

天津橋

白居易

津橋東北斗亭西到此令人詩思迷  
睂月晚生神女浦臉波春傍窈娘堤  
柳絲裊裊風縵出草縷茸茸雨剪齊  
報道前驅少呼喝恐驚黃鳥不成啼

與諸道者同遊二室至九龍潭作

白居易

喜逢二室遊仙子厭作三川守  
土臣舉手摩挲潭上石開襟斗數府  
中塵他日終爲獨往客今朝未是自由身  
若言却是嵩山王三十六峰應笑人

履道池上作

白居易

家池動作經旬別松竹琴魚好在無  
樹暗小巢藏巧婦渠荒新葉長慈姑  
不因車馬時時到豈覺林園日日蕪  
猶喜春深公事少每來花下得踟躕

和敏中洛下卽事

白居易

昨日池塘春草生阿連新有好詩成  
花園到處鶯呼入驄馬遊時客避行  
水暖魚多似南國人稀塵少勝西京  
洛中佳境應無限若欲諳知問老兄

開龍門八節石灘詩二首

并序

白居易

東都龍門潭之南有八節灘九峭石船筏過此例反  
破傷舟人楫師推挽束縛大寒之月躑躅水中飢凍

詩六

有聲聞於終夜予嘗有願力及則救之會昌四年有  
悲智僧道遇適同發心經營開鑿貧者出力仁者施  
財於戲從古有礙之險未來無窮之苦忽乎一旦盡  
除去之茲吾所用適願快心拔苦施樂者耳豈獨以  
功德福報為意哉因作二詩刻題石上  
以其地屬寺事因僧故多引僧言見志

鐵鑿金鉅般若雷八灘九石劒稜摧竹篙桂檝飛如箭百筏  
千艘魚貫來振錫導師憑衆力揮金退傅施家財他時相逐  
西方去莫慮塵沙路不開

七十三翁旦暮身誓開險路作通津夜舟過此無傾覆朝脛  
從今免苦辛十里叱灘變河漢八寒陰獄化陽春我身雖歿  
心長在閻施慈悲與後人

清明日登老君閣望洛城贈韓道士

白居易

風光煙火清明日歌哭悲心歡城市問何事不隨東洛水誰家  
又墓北邙山中倚車馬長無已下渡舟航亦不閒冢墓累累  
人擾擾遼東帳望鶴飛還

題龍門堰西澗

短律附

白居易

東岸菊藜西岸柳柳陰烟合菊花開一條秋水琉璃色關狹  
纔容小舫回除却悠悠白少傅何人解入此中來

洛下閒居寄山南令狐相公

白居易

已收身向園林下猶寄名於祿仕間不鍛嵇康彌嬾靜無金  
疎傅更貧閒支分門內餘生計謝絕朝中舊往還唯是相君  
忘未得時思滿水夢巴山

履道西門二首

白居易

履道西門有敝居池塘竹樹繞吾廬豪華肥壯雖無分飽暖  
安閒卽有餘行竈朝香炊早飯小園春暖掇新蔬夷齊黃綺  
誇芝蕨比我盤餐恐不如

履道西門獨掩扉官休病退客來稀亦知軒冕榮堪戀其奈  
田園老合歸跛鼈難隨騏驥足傷禽莫趁鳳皇飛世間認得  
身人少今我雖愚亦庶幾

壽安縣馬重吟

白居易

春衫細薄馬蹄輕一日遲遲進一程野棗花含新密氣山禽  
語帶破匏聲垂鞭晚就槐陰歇低唱閒衝柳絮行忽憶家園

須速去櫻桃欲熟翁應生

以上皆長慶集

到洛陽寓居宣教里

時已春暮而四老俱在洛中分司

李紳

青莎滿地無三徑白髮緣頭忝四人官職謬齊商嶺客姓名  
那重漢廷臣聖朝寡罪容衰齒愚叟多慙未退身惟有門人  
憐鈍拙勸教沉醉洛陽春

粹文

重入洛陽東門

李紳

商顏重命伊川叟時事知非入洛人連野碧流通御苑滿階  
秋草過天津每慚清秩容衰齒猶有華簪寄病身驅馬獨歸  
尋里巷日斜行處舊紅塵

英華

拜三川宮

李紳

恭承寵詔臨伊洛靜守朝章化比閭風變市兒驚偃草雨晴

郊藪謬隨車改張琴瑟移膠柱止息笙篁辨魯魚唯有從容

期一德使齊文教奉皇居同上

洛陽春望

鮑溶

五鳳樓南望洛陽龍門廻合抱蒼蒼受朝前殿雲霞煥封岳

行宮草木香四時為家知德盛二京有宅卜年長東人猶憶

時巡禮願覲元日日月光全唐詩

送從叔尉池

顧非熊

同登科第皆清尚愛東畿一尉閑雖有田園供海畔且無

宗黨在朝班只為心知道晚達多緣性好山白首青衫

猶未換又騎羸馬出函關同上

洛陽感寓

張祐

擾擾都城曉四開不關名利也塵埃千門甲第身遙入萬里

銘旌死後來洛水墓煙橫莽蒼卽山秋日露崔嵬須知此事

堪為鏡莫遣黃金漫作堆同上

李給事中敏

杜牧

一章緘拜阜囊中懍懍朝廷有古風元禮去歸綏氏學李膺退罷

歸綏氏教授生徒給事論鄭注告滿歸潁陽江充來見犬臺宮鄭注對於浴室紛紜白晝

驚千古鉄鑽朱殷幾一空曲突徙薪人不會海邊今作釣魚

翁牧之集

洛陽長句二首

杜牧

草色人心相與閑是非名利有無間  
橋橫落照虹堪畫樹鎖千門鳥自還  
芝蓋不來雲杳杳仙舟何處水潺潺  
君王謙讓泥金事蒼翠空高萬歲山

天漢東穿白玉京日華浮動翠光生  
橋邊遊女珮環委波底

上陽金碧明月鎖名園孤鶴唳川酣  
秋夢鑿龍聲連昌繡嶺

行宮在玉輦何時父老迎

同上

洛陽

杜牧

文爭武戰就神功時似開元天寶中  
已建元戈收相土應廻翠帽過離宮  
侯門草滿宜寒兔洛浦沙深下塞鴻  
疑有女娥

西望處上陽煙樹正秋風

同上

金谷懷古

杜牧

淒涼遺跡洛川東浮世榮枯萬古同  
桃李香消金谷在綺羅魂斷玉樓空  
往年人事傷心外今日風光屬夢中  
徒想夜泉流客恨夜泉流恨恨無窮

同上

送蕭處士歸緱氏別業

許渾

醉斜烏帽髮如絲曾看仙人一局棋  
賓館有魚爲客久鄉書無雁到家遲  
縱山住近吹笙廟湘水行逢鼓瑟祠  
今夜月明何處宿九疑雲盡碧參差

丁卯集

故洛城

許渾

禾黍離離半野蒿昔人城此豈知勞水聲東去市朝變山勢  
北來宮殿高鴉噪暮雲歸古堞鴈迹寒雨下空壕可憐維嶺  
登仙子猶自吹笙醉碧桃同上

欲遊嵩岳留別李少尹益

賈島

孤策遲迴洛水湄孤禽嘹唳嘆幸人知嵩岳望中常待我河梁  
欲上未題詩新秋愛月愁多雨古觀逢仙看盡棋微眇此來  
將敢問鳳凰何日定歸池浪仙集

寄河南杜少尹

温庭筠

十載歸來鬢未凋玳簪珠履見常修已 兩名利分榮路自有  
才華作慶霄鳥影參差經上苑清聲斷續過中橋夕陽亭畔

山如畫應念田歌正寂寥飛卿集

晚秋洛陽客舍

劉滄

清洛平分兩岸沙沙邊水色近人家隋朝古陌銅駝柳石氏  
荒原金谷花庭葉霜濃悲遠客宮城日晚度寒鷄未成歸計  
關河阻空望白雲鄉路賒全唐詩

題龍門僧房

劉滄

靜室遙臨伊水東寂寥誰與此身同禹門山色度寒磬蕭寺  
竹聲來晚風僧宿石龕殘雪在鴈歸沙渚夕陽空偶將心地  
問高士坐指浮生一夢中同上

登龍門敬善寺閣

劉滄

獨步危梯入杳冥，天風瀟灑拂簷楹。禹門煙樹正春色，少室雲屏向晚晴。花落院深清禁閉，水分川闊綠蕪平。瑣窗朱檻同仙界，半夜縹山有鶴聲。上

洛陽月夜書懷

劉滄

疎柳高槐古巷通，月明西照上陽宮。一聲邊鴈塞門雪，幾處遠砧河漢風。獨榻閑眠移嶽影，寒窗幽思度煙空。孤吟此文驚秋晚，落葉殘花樹色中。上

過北邙山

劉滄

散漫黃埃滿北原，折碑橫路碾苔痕。空山夜月來松影，荒塚春風變木根。漠漠兔絲羅古廟，翩翩丹旆過孤村。白楊落日悲風起，蕭索寒巢鳥獨奔。上

故洛陽城

李邕

賊兵一動朔方塵，不使鑾輿此重巡。清洛但流嗚咽水，上陽深鎖寂寥春。雲收少室初晴雨，柳拂中橋晚渡津。欲問升平無故老，鳳樓回首落花頻。上

洛中寒食二首

皮日休

千門萬戶掩斜暉，繡幃金銜晚未歸。擊鞠王孫如錦地，鬪雞公子似花衣。嵩雲靜對行臺起，洛鳥閑穿上苑飛。唯有路傍無意者，獻書未納問淮肥。

遠近垂楊映鈿車，天津橋影壓神霞。弄春公子正迴首，趨節

行人不到家洛水萬年雲母竹漢陵千載野棠花欲知豪貴  
堪愁處請看印山晚照斜同上

經故洛城

羅 鄴

一片危牆勢恐人牆邊日日走蹄輪築時驅盡千夫力崩處  
空為數里塵長恨往來經此地每嗟興廢欲霑巾那堪又向  
荒城過錦雉驚飛麥隴春同上

洛水

羅 鄴

一道潺湲澗暖莎年年惆悵是春過莫言行路聽如此流水  
深宮悵更多橋畔月來清見底柳邊風緊綠生波縱然滿眼  
添歸思未把漁竿柰爾何同上

洛陽春望

羅 鄴

洛陽春霽絕塵埃嵩少煙嵐畫障開草色花光惹襟袖簫聲  
歌響隔樓臺人心便覺閑多少馬足方知倦往來愁上中橋  
橋上望碧波東去夕陽催同上

春日過壽安山館

羅 鄴

舊國多將泉石親西遊愛此拂行塵簾開山色離亭午步入  
松香別鳥春誰肯暫安耕釣地相逢謾歎路岐身歸期不及  
桃花水江上何曾鱸雪鱗同上

經故洛陽城

羅 隱

敗垣危堞跡依稀試駐羸驂弔落暉跋扈以成梁冀在簡書



難問杜喬歸由來世事須翻覆未必餘才解是非千載昆陽  
好功業與君門下作恩威

昭諫

上陽宮辭

吳融

苑路青青半是苔翠華西去未知回景陽春漏無人報太液  
秋波有雁來單影可堪明月照紅顏無奈落花催誰能賦得  
長門事不惜千金奉酒榼

子華集

望嵩山

吳融

三十六峰危似冠晴樓百尺獨登看高凌鳥外青冥翠落  
人間白晝寒不覺衡陽遮雁過如何鍾阜鬪龍盤始知萬歲  
聲長在只待東巡動玉鸞

同上

過澠池書事

吳融

澠池城郭半遺基無限春愁挂落暉柳渡風輕花浪綠麥田  
煙暖錦雞飛相如忠烈千秋斷二主英雄一夢歸莫道新亭  
人對泣異鄉殊代也霑衣

同上

洛北村居

韋莊

十畝松篁百畝田歸來方屬大兵年巖邊石室低臨水雲外  
嵐峰半入天鳥勢去投金谷樹鐘聲遙出上陽煙無人說得  
中興事獨倚斜暉憶仲宣

浣花集

寄盧端公同年時遷都洛陽新立幼主

徐夔

上陽宮闕翠華歸百辟傷心序漢儀崑岳有炎瓊玉碎洛川

無竹鳳皇飢須簪白筆匡明主莫許黃瓠博少師惆悵宸居  
遠于日長吁空摘鬢邊絲全唐詩

洛城見賀自真飛昇

東陶

子晉鸞飛古洛川金桃再熟賀郎仙三清樂奏嵩峯下五色  
雲屯御苑前朱頂舞低迎絳節青鬟歌對駐輜輶誰能白晝  
相悲泣太極光陰億萬年同上

北邙山

吳商皓

北邙山草又青青今日銷魂事可明綠酒醉來春未歇白楊  
風起柳初晴岡原旋葬松新長年代無人闕半平堪取金爐  
丸還藥不能隨夢向浮生同上

題焚經臺

經圖紀云漢明帝世佛法初入中國于永平十四年正月十五日大集白馬寺南門會

道士齋靈寶諸經與佛經符舍利置兩壇舉火焚燒佛舍利放光道經獨燬燼無存後人因其處稱焚經臺也此詩載翻譯名義集云唐太宗作其聲調不類要是後人妄託

無名氏

門徑蕭蕭長綠苔一回登此一徘徊青牛謾說函關去白馬  
親從印土來確實是非憑烈焰要分真偽築高臺春風也解  
嫌狼籍吹盡當年道教灰全唐詩

遊嵩山

熊皎

獨背焦桐訪洞天暫攀靈迹棄塵緣深逢野草皆疑藥靜見  
樵人恐是仙翠木入雲空自老古碑橫水莫知年可憐幽景  
堪長往一任人間歲月遷同上

宋

還過東都留守周公筵上贈座客

徐鉉

賈生三載在長沙故友相思道路賒已分中年甘寂寞豈知今日返京華麟符上相恩偏厚隋苑留歡日欲斜明日江頭倍惆悵遠山芳草映殘霞

宋詩選

尹洛日作

呂蒙正

昔作儒生謁貢闈今提相印出黃扉九重鴛鴦醉中別萬里烟霄達了歸鄰叟盡垂新白髮故人猶著舊麻衣洛陽謾說多才子自歎遭逢似我稀

宋詩紀事

送劉易歸洛

韓琦

滿懷經術欲誰傳却憶西歸滄洛田富貴苟求誠損義聖賢難遇亦推天春風始入花王國夜月長涵宓女川巖谷弓旌如未及且憑詩酒作閑仙

安陽集

遊洛中內

蘇舜欽

洛中宮闕鬱嵯峨千古榮華逐逝波別殿秋高風浙瀝後園春老樹婆娑露凝碧瓦寒光滿日轉觚稜暖豔多早晚金輿此游幸鳳樓前後看山河

滄浪集

再至西都

歐陽修

伊川不到十年間魚鳥今應恠我還浪得浮名銷壯節羞將白髮見青山野花向客開如笑芳草留人意自閑卻到謝公

題壁處向風清淚獨潺湲

遊石子澗

歐陽修

截辟高亭古澗隈偶携佳客共徘徊  
席間風起聞天籟雨後山光入酒杯  
泉落斷崖衝壑響花藏深崦過春開  
麈尾為鳥莫驚顧太守不將車騎來

以上文忠集

和邵堯夫秋霽登石閣

司馬光

飛簷危檻出林端玉屋嵩邱咫尺間  
獨愛高明遊佛閣豈知憂喜滿塵寰  
目窮莽蒼纖毫盡身得逍遙萬象閑  
暇日登臨無厭數悲風殘葉已珊珊

新買疊石溪莊再用前韻招景仁

司馬光

一溪清水珮聲寒兩岸莓苔錦繡斑  
三徑誰來卜鄰舍千峰我已作家山  
鹿裘藜杖偏宜老紫陌紅塵不稱閑  
早挈琴書遠相就放歌爛醉白雲間

和君况題潞公東莊

司馬光

高峰遠疊千重雪伊浦低臨一片天  
百頃平臯連別館兩行疎柳拂清泉  
國須柱石扶丕構人待樓航濟巨川  
蕭相方知左右手且於窮僻置閑田

和潞公真率會詩

司馬光

洛下衣冠愛惜春相從小飲任天真  
隨家所有自可樂為具雖微誰笑貧  
不待珍羞方下箸只將佳景便娛賓  
庾公此興

知非淺藜藿終難作主人以上温公集

和副樞貝諫議寄題廣化寺東軒

文彦博

淨居高出四禪天更對伊嵩闢廣軒塔聳千花依鷲嶺舟浮  
一葉上龍門雲藏古木當危檻風遞疎鐘過遠村我有草堂  
南澗口一回西望一銷魂

近聞有真率會呈提舉端明司馬

文彦博

近知雅會名真率率意從心各任真顏子簞瓢猶自樂庾郎  
鮭韭不為貧加籩只恐勞煩主緝御徒能困倦賓務簡去華  
方盡適古來彭澤是其人

宿獨樂園詰朝將歸

文彦博

平曉何人汲井汲井曉鐘聲散曉春鴉開園更有四五日映葉  
尚餘三兩花宿病岑岑猶未無眠耿耿不禁茶白嫌行樂  
妨年少遽索籃輿且向家

宿少林寺

文彦博一作樓異

六六仙峯繞佛居俗塵至此暫銷除西來未會禪師意北去  
應馳使者車子方受命五品封槐今尚在九年面壁昔何如  
心知一宿猶難覺花藏重尋貝葉書

安樂窩中吟

邵雍

安樂窩中春不虧山翁出入小車兒水邊平轉綠楊岸花外  
就移芳草堤明快眼看三月景康強身歷四朝時鳳凰樓下

天津畔仰面迎風倒載歸

安樂窩中春暮時閉門慵坐客來稀蕭蕭微雨竹間霽  
翠禽花上飛好景盡將詩記錄驩情須用酒維持自餘身外  
無窮事皆可掉頭稱不知

洛下園池

邵雍

洛下園池不閉門洞天休用別尋春縱遊只却輪囷客遍入  
何常問主人更小亭欄花自好儘荒臺榭景纔真虛名誤了  
無涯事未必虛名總到身

閒居吟

邵雍

閒居須是洛中居天下閒居皆莫如文物四方賢俊地山川  
千古帝王都絕奇花畔持芳醕最軟草間移小車只有堯夫  
負親舊交親殊不負堯夫

首尾吟錄三

邵雍

堯夫非是愛吟詩詩是天津竚立時有意水聲千古在無情  
山色四邊圍孤鴻遠入晴烟去雙鷺斜穿禁柳飛景物不妨  
閒自適堯夫非是愛吟詩

堯夫非是愛吟詩詩是堯夫信脚時高祖宅前花似錦魏王  
堤畔柳如絲因閒看水行來遠就便遊園歸去遲每遇好風  
還眷眷堯夫非是愛吟詩

堯夫非是愛吟詩詩是堯夫出入時草軟沙平月陂下雲輕

日淡上陽西花深柳暗銅駝陌風暖鶯嬌金谷堤盡是堯夫  
行樂處堯夫非是愛吟詩

春遊吟

邵雍

人閒佳節惟寒食天下名園重洛陽金谷煖橫宮殿碧銅駝  
晴合綺羅光橋邊楊柳細垂地花外鞦韆半出牆白馬蹄輕  
草如剪爛遊于此十年狂

小車吟

邵雍

自從三度絕韋編不讀書來十二年大斃子中消白晝小車  
兒上看青天閑爲水竹雲山主靜得風花雪月權俯仰之閒  
無所媿任他人說似神仙

壽安縣遠望

邵雍

體嘆浮生榮與辱且聽終日水潺潺遙穿暝藹孤鴻去橫截  
烟霞鸞鷺還佳樹排音巖下圃好風環翠縣前山寄言名利  
差輕者少輟光陰到此間

以上擊壤集

遊月陂

程顥

月陂堤上四徘徊北有中天百尺臺萬物已隨秋氣改一罇  
聊爲晚涼開水心雲影閑相照林下泉聲靜自來世事無端  
何足計但逢佳日約重陪

程書

和堯夫先生月陂上閒步

程顥

先生相與賞西街小子親持几杖來行處每容參極論坐隅

還許侍餘杯檻前流水心同樂林外青山眼重開時泰心閒  
難兩得直須乘興數追陪程書

和子由澠池懷舊

蘇軾

人生到處知何似應似飛鴻踏雪泥泥上偶然留指爪鴻飛  
那復計東西老僧已死成新塔壞壁無由見舊題往日崎嶇  
還記否路長人困蹇驢嘶公自注在歲馬死於二陵騎驢至澠池文忠集

送文太師還洛

蘇轍

國老無心豈為身五年朝謁慰簪紳元臣事業通三世舊將  
威名服四隣遍閱後生真有道欲談前事恐無人知公惟有  
凌雲會歲歲何妨雨露新樂城集

送直講吳殿丞宰鞏縣

王安石

青嵩碧洛曾游地墨綬銅章忽在身擁馬尚多畿甸雪隨衣  
無復禁城塵古來學問須行已此去風流定慰人更憶少陵  
詩上語知君不負鞏梅春荆公詩集

春霽憶洛陽

韓維

少年結客洛陽時閑傍東風駐馬蹄山色遠饒潘岳宅波光  
輕撼窈娘堤花繁到處紅如堵酒好尋常醉似泥賴有金臺  
舊知己應憐魂斷虎牢西南陽集

過天津橋

蔡襄

日暖溪平水漸銷水聲纔下內前橋山川滿眼閒宮殿草樹



逃人舊市朝每向尋春偏有意却成懷古更無聊洛陽平昔  
多豪俊惆悵魂不可招

忠惠集

歲暮福昌懷古

張耒

少年詞筆動時人末俗文章久失真獨愛詩篇超物象祇應  
山水與精神清溪水拱荒涼宅幽谷花開寂寞春天上玉樓  
終恍惚人間遺事已埃塵

李賀宅

渡洛因泛舟東下數里頗意淮上

張耒

泂泂清洛轉山隈渺渺東流不復回輕鳥竟隨青嶂去亂波  
爭泛夕陽來偶驚舟楫鄉心起乍脫塵埃病眼開疑是野貽  
郭門外月明帆席過清淮

以上苑邸集

洛陽春

王操

帝里山河異莫裁就中春色似先來暖融殘雪當時盡花得  
東風一夜開艷日綺羅香上苑沸天簫鼓動瑤臺芳心只恐  
烟花暮閑立高臺望幾回

宋文鑑

澠池道中寄福昌令張景良通直

晁補之

十年一夢間湖湘欲往從之道阻長可但知君愛彭澤不應  
言我薄淮陽馬穿嶠底流泉白鳥下關頭落照黃愁作驛亭  
寒不寐懷人思古九迴腸

雞肋集

金

永寧南原秋望

元好問

浩浩西風入敝衣茫茫野色動清悲洗開塵漲雨纔定老盡  
物華秋不知烽火苦教鄉信斷砧聲偏與客心期百年人事  
登臨地落日飛鴻一線遲

望崧少二首

元好問

崧少飛來崑閩山山家茅屋翠微間雞豚鄉社相勞苦花木  
禪房時往還結習尚餘三宿戀殘年多負半生閑長河一葦  
人千里望斷西城碧玉環

飲鶴池邊萬木稠養龍崖上五峰秋藤垂絕壁雲添潤澗落

哀湍雪共流田父占年驚玉旆詩僊留迹歎崑邱西風落日

山陽道空對紅塵憶舊遊

飲鶴池在緱山養龍崖在五乳峰下

懷州子城晚望少室

元好問

河外青山展卧屏并州孤客倚高城十年舊隱拋何處一片  
傷心畫不成谷口暮雲知鄭重林梢殘照故分明洛陽見說  
兵猶滿半夜悲歌意未平

洛陽

元好問

千年河岳控喉襟一日神州見陸沉已為操琴感衰涕更湏  
同輩夢秋衾城頭大匠論蒸土地底中郎待摸金擬就天公  
問翻覆蒿萊丹碧果何心

過三鄉望女几郵懷溪南詩老辛敬之 元好問

雲際虛瞻處士星案頭多負讀書螢筆端有口傳三篋石上

無禾養百齡從昔葛陂終變滅祇今韓嶽謾英靈因君重為

前朝惜枉破青衫買一經女几山土人謂之韓嶽

萬山青繞一川斜好句真堪字字誇棄擲泥塗豈天意折除  
時命是對百錢卜肆成都市萬古詩壇子美家欲就溪南

問遺事不禁哀涕落煙霞

洛中作

元好問

樂府新聲綠綺裘梁州舊曲鴟纏頭酒兵易壓愁成破花影  
長隨日脚流萬里青雲休自負一莖白髮儘堪羞人間只怨

天公了未便天公得自由以上遺山集

送裕之還嵩山

王偓

高懷不受簿書浸清潁鷗盟欲重尋老去官情知我簿間來  
道念見君深對牀夜雨他年夢滿烏西風此日心嵩頂勝游  
誰得共仙門仙馭待知音

穎亭

王偓

三載西湖阻勝游穎亭聊喜散羈愁九山西絡煙霞去一水  
南吞澗壑流賓主唱酬空翠琰干戈橫絕自滄洲勿勿匹馬  
從君去慚愧煙波萬里鷗

游少林寺

許安仁

巖壑深嚴入翠微少林金碧霧烟霏五峰屏簇禪庵小萬仞  
天開佛日輝聞說九年空面壁得逢二祖便傳衣千秋少室

山靈在曾見先師隻履歸

超化寺

王庭筠

隔竹微聞鐘磬音  
墻頭修竹冷陰陰  
山迎初日花枝靚  
寺裏清潭墀影深  
吾道蕭條三已仕  
此行衰病獨登臨  
簡書催得勿勿去  
暗記風烟擬夢尋

嵩山承天谷

趙秉文

烟霞直上迢迢谷  
路轉山腰咫尺述  
已覺洞天分聖境  
更疑石磴是仙梯  
霜添紅葉黃花好  
天與金壺玉柱齊  
醉倚西風正南望  
暮雲烟草一時低

以上中州集

洛陽懷古

楊果

洛陽雲樹鬱崔嵬  
落日行人首重回  
山勢忽從平野斷  
河聲偏傍故宮哀  
五噫擬逐梁鴻去  
六印休驚季子來  
惆悵青槐舊時路  
年年無數野棠開

西菴集

過狄仁傑墓

楊果

牝雞聲裏紫宸寒  
神器都歸竊弄間  
一語喚回鸚鵡夢  
九霄奪得鳳雛還  
荒墳寂莫臨官道  
清節孤高重泰山  
爲問模稜蘇相國  
當時相見果何顏

同上

嵩山

鄭棻

一重山隔一重雲  
一澗花藏一澗春  
泉石任渠輕俗客  
烟霞

元自重高人指開松影杖頭濕踏破苔痕屐齒親笑我青山  
未歸老蕭蕭鞭馬軟紅塵說

遊嵩嶽詩

蒲理翰

嵩嶽巖前鐵索樓朱宇隱層霄道人步月拾瑤草童子  
倚雲吹玉簫灑澗石壇遲晝景龍藏金鼎長丹苗苔封少室  
山前路何許高人索價饒淵鑑類函

輓轅

陳士基

遠遊重到洛陽城又向登封道上行路入輓轅秋更險雲收  
太室雨初晴千重灌木漫山碧百道飛泉繞澗鳴欲訪巢由  
渺何許空餘潁水照人清夷白齋藁

洛陽懷古

劉質

攬轡登臨感興濃東都形勝古來雄兩關地扼東西外一氣  
天分子午中雲淡嵩山高冢在水流伊洛故城空銅駝陌上  
思前事落日惟聞牧笛聲元詩選

白樂天影堂

楊雲鵬

晚慕浮圖伴衲衣至今高榜揭巖扉夢中身世原無有壁上  
形容果是非但得蓬蒿猶可住何須堯率是真歸渺茫兩地  
知何在滿眼春波白鷺飛

奉祀嵩山夜宿少林寺

李允中

蔥嶺當時遇宋雲手提隻履果何因入山便得安心法立雪

能來斷臂人錫卓一泓雲浸影花開五葉地生春無勞照石  
瞻遺像滿日青山是法身

游少林寺

程相

杖屨徒登禮少林亂山佳氣鬱森陰松杉色露真如相禽鳥  
聲傳梵國音可笑九年間面壁却憐二祖與安心西來一曲  
調終古白雪陽春和到今

題洛陽朝元宮

譚處端

宮門寂寂鎖祥煙古蹟靈蹤尚儼然雲罩連枝烹藥鼎霞生  
靈井漑丹泉日魂煉就華胥國月魄收將不夜天紫詔師真  
歸去後未知孰繼大羅仙以上元詩題

明

寄永寧丁明府兼簡達君先生

高啟

政成百里自材優莫厭青袍映白頭盜散山棚城少閉渠通  
田澮水多流陸渾莊上雞鳴午緱嶺祠前鶴去秋沽酒更須  
煩縣令洛中時伴玉川遊原注永寧丁近布平盜浚渠之功達君前進士寓其邑大全集

洛水道中

薛瑄

古道縈迴傍險行蕭蕭禾黍晚風清無邊詩思嵩高色不盡  
年光洛水聲華表柱傾秋草舍龜趺碑暗雨苔生往來人世  
成今古一曲高歌寄此情

澠池懷古次劉僉憲韻三首

薛瑄

行過峭陵到澗池九秋黃葉撲人衣風來澗水波聲急雲下  
韶山樹影微地遠黃河連暮靄峰高白石淡秋暉當時秦趙  
同盟處只有荒邱鳥雀飛

澗流猶遠舊城池城下秋風動客衣桓冢未荒王業降盟臺  
已築霸功微石門衰草連秋色亭柱涼林暎夕暉更上馬頭  
高處望五龍潭畔暮雲飛

山作高城水作池諸侯曾此會戎衣臺荒已見兵威息波響  
猶疑瑟韻微周黨聲名垂汗竹桓王弓劍靄斜暉登臨不盡  
千年意日送秋空雲鴈飛

新安次劉愈憲韻

薛瑄

千載新安要路邊函關知是漢時遷水流澗澗深還靜山接  
嵩卽斷復連古洞碁枰疑妄迹白墻石溜卽名泉平生最愛  
錢宣靖絕勝王喬第一仙

以上文  
清集

謝徽

題宋復古鞏洛圖  
青山鞏洛舊林園彷彿昇平古意存雨外人歸秋葉浦煙中  
鳥下夕陽村昔年題字宸光合今日披圖野興繁風景西湖  
仍不異惟餘故老說中原

明詩  
綜

少林寺

李慶陽

林深谷暝客子入鐘鳴葉落秋山空煙雲細裊石澗底巒岫  
亂積松窻中唐碑漢碣蘚字剥虎啼猿嘯蘿燈紅獨坐悠悠

息塵想少室影下月出東

望少林次韻

李夢陽

三十六峯雲氣迥何峯寺西何者東  
林巖霜橫遠亦靜煙嵐日破重還空  
千山盡歷暮轉碧一樹不落秋能紅  
漸聞鐘聲出杳靄得路誰憐馬僕功

宿少林次韻

李夢陽

萬山微暝一鐘鳴古寺深秋倦客情  
僧本折蘆翻面壁人非騎鶴故吹笙  
寒催亂木風交響白動虛巖月自生  
慚愧勞勞不成寐丁丁卧聽早樵聲

以上空同集

洛陽懷古

周敘

春風弔古洛城邊一望川原思渺然  
綠野堂湮空宿燕天津橋廢不聞鶻  
成周故國寒烟外汴宋諸陵夕照前  
獨有澗瀍流水在滄波東去自年年

洛陽懷古

韓文

纔過溪橋又渡河征鞍暫解宿彭婆  
風欺客髮頻沾土香拂佛頭錯認螺  
洛水東流空浩蕩卽山北枕尚峩峩  
繁華不見當年景弔古令人恨轉多

以上明詩選

遊龍門

唐順之

龍門巖巖拂雲迴鯨浪奔騰動地來  
一片飛泉千仞落百重疊巘五丁開  
水同瀍澗縈天邑山接峭函鎖帝臺  
勝槩依稀



似禹穴好奇徒愧馬遷才荆川集

晚步天津

王雲鳳

山光翠疊老龍鱗故國遺墟草自新世事盡隨伊闕水行人  
獨踏漢宮塵北印高冢元無主金谷殘花不繫春却恐杜鵑  
今再至天津橋上客傷神明詩選

嵩陽宮三將軍栢

黃克晦

人間栢大此全稀老幹寧論四十圍蓋偃曾傾天子葆露寒  
應覆侍臣衣猶看連影容千騎那識何枝繫六飛惆悵茂陵  
無限樹荒邱殘隴草菲菲黃山人集

送周編修代祭宋陵

王直

幽香分祀宋諸陵使節皇華寵渥承河水遠通平野外嵩山  
高出亂雲層馬遷勝覽憐予病李白豪吟羨子能名到薇垣  
謝知己山陰短棹興難乘以上通志

洛中

王廷相

中天葱鬱周南國西望龍蟠古甸層洛水微茫隋大業邛山  
隱見漢諸陵荒原杜宇春啼血廢陌銅駝夜有靈誰弔遺跡  
雲霧裏暮笳哀角不堪聽家藏集

九日同呂文川宿龍門洞中

溫如璋

谷口明霞烟樹低龍門夜整石床棲出林弦月光侵席瀑洞  
珠泉響注谿佳節名山難並遇繁絃急管對留題君看萬佛

崖端像寂寞前朝風雨淒

舊志

京洛

劉鳳

宅中形勢潤溷深作洛千年王氣沉關控河流當地軸岳分  
嵩少壓天心西來驛路連雍時北枕秦城接華陰禹跡茫茫  
敷九土獨令盤石誦虞箴

子威集

登太室

俞安期

石室逶迤石徑通艱危雙履出龍嵒峯懸午日天中定河引  
春流洛浦平雷動呼聲傳武帝雲扶鶴駕望山翁神漿更作  
三臺上乘月思過玉女宮

嵩書

少室

俞安期

嵩高中斷並神邱杖底泉開潁水流低度嵐陰連太室遠分  
山色遶中州掛衣春樹三花滿擁幔晴雲午彩浮遙傍星樓  
天半宿少微永夜在峯頭

同上

遊安樂窩

耿裕

伊闕當前背洛河先生于此號行窩一區廢址規模在千載  
遺風感慨多皇極有書昭日月古碑無字卧烟蘿偶聞林叟  
閑談論猶道當年擊壤歌

明詩永

范文正公祠

彭綱

褒賢寺外水潏潏魏國祠前草似茵廊廟江湖方寸地文章  
事業百年身月明華表空山夜雨過珉堦老樹春嵩岳極天

河極海高墳千古鎮長新詩綜

環翠亭

劉健

小亭軒濶枕瀍隈曾共名流日往回初去新園方錦繡歸來  
敝屋已塵埃讀書窗廢多無紙灌藥渠乾總是苔惟有南山  
當面立對人依舊送青來

詩閱

環翠亭

喬縉

幽境當年聚德星飛騰已見徙南溟一灣春水繞軒碧數點  
晴峯入牖青月下影移棲鳳竹夜深光點照書螢四時花木  
常環翠風過虛亭只自馨

遊三井洞

邱起鳳

鶴背仙人去不還仙家靈境自天然風吹玉乳岷頭樹雲覆  
金沙洞裏田曲水東浮連海嶠亂山北下俯晴川星壇寶籙  
春長在閱盡園陵幾變遷以上舊志

題鉢孟峯二祖菴

黃輝

澗響藤枝百折秋萬峯蒼翠鉢孟收轅轅鳥跡空山下河洛  
龍光天外流石怒亂隨獅子擲塔靈高許雁王投眼看浩劫  
長如此誰道真僧有去留怡春堂集

同曹令遊嵩少酌盧巖泉

黃輝

太室少室蓮花巾大熊小熊巢父隣喜從白社遭賢令笑共  
青山閱過人茶竈煮來秋月苦芝籃提去夕陽貧盧巖已不

知鴻乙名姓何勞着片珉同上

許由古冢

張琳

讓位唐虞事絕倫  
寓言巢許事皆陳  
箕山有墓空如斧  
潁水無風靜不塵  
葉底鵲仍哀  
露隴頭黃犢自耕春  
高蹤千古真堪訓  
後世何多受禪臣通志

安樂窩

秦金

誰築行窩古澗濱  
衣冠猶見宋遺民  
皇王帝霸經綸妙  
濂洛關閩統緒真  
心潑檻前靈竇  
水神遊花外小車春  
茫茫後學空山斗  
惆悵臨風一薦蘋明詩存

洛城晚眺

張含美

戍樓獨倚思茫茫  
雨霽寒煙接大荒  
背郭午橋喧野渡  
連雲甲第入斜陽  
林封谷口紅霞燦  
水漱厓根白練長  
畫角一聲起何處  
空驚雁影下陂塘舊志

箕陰避暑

傅文

獨愛雲林境界幽  
綠陰蔽日翠光浮  
棄瓢巖畔排煩熱  
洗耳溪邊枕細流  
每有涼風來樹底  
更無塵事到心頭  
許由巢父今何在  
千古箕山五月秋說嵩

登太室絕頂

袁宏道

礫瓦紛紛雨洗斑  
嵩峰久矣閉仙關  
雲開忽見玲瓏壁  
水外微鋪淡遠山  
古道孰知龍洞嶮  
僧云勝在石樓間  
幽巖欲去

無棲處獵火燒空照夜還

盧巖瀑布

袁宏道

百尺煙中紫翠分水光搖日雪紛紛長風碎曳千年石飛雨  
斜侵半壁雲澗底有人穿洞出山間投礫隔林聞仙家只在  
深嵐裏松腹猶存鳥篆文

洞門長是帶雲關竹杖深穿杳靄閒醉裏放杯眠澗水夢中  
和雨入廬山霞光射壁殘碑出松影流堦處士還潭下老龍  
呼不起携將新月過煙臺

以上中  
郎集

少室

王履和

九頂蓮華葉葉分旭光一抹淨塵氛洛川風起晴飛雨崑嶺  
烟封曉度雲萬壑鐘聲通窈窕千秋劍氣吐氤氳漢唐御躡  
從何識古木蕭蕭鳥自羣

石淙

戚伯堅

境外尋真境亦真空山雨洗壁痕新怒流亂射泉千罅砥石  
中蹲座百人花罨綺筵張繡幕草深碧澗走朱鱗幽巖若可  
添茅屋卧聽松風老此身

嵩陽宮

李化龍

懸崖壞壁草芘芘傳是嵩陽舊日宮何處閒雲飛嶺外有時  
佳氣起封中螭紋剝落唐碑古虬樹陰森漢柏雄指點千年  
成感慨悲風蕭颯萬山空

以上  
說嵩

登嵩

傅梅

丹崖翠嶂倚晴空呼吸還疑帝座通  
至北至南均日影交風  
交雨列天中高含元氣三台近  
分奠坤維四嶽同豈為山呼  
崇祀典虞庭柴望已無窮

維園稿

清明同友人登九龍臺遊三井洞

呂維祺

輕風晴日拂春衣携酒閒探入翠微  
誰見洞穿三鶴起人疑  
臺控九龍飛紙錢荒棘迷高隴  
青草垂楊亂夕暉極日郊原  
憑弔處無妨隨俗踏芳菲

相傳三井洞有三仙化鶴事

清灑環湧一臺高不覺相將屐齒勞  
麥隴柳烟含宿雨竹橋  
帘影醉晴桃西來雜水浮熊耳  
東鎖緱山帶虎牢勝地况逢

修禊節騷人詩酒未為豪

少德先生集

國朝

登天中閣

王鐸

四圍紫邏坐相望突兀高峯劃大荒  
誰復凌空呼帝座我今  
乘勝挹天漿香烟古廟通靈氣石路神  
邱接太陽凍草暮雲  
無限意漢家封禪舊山房

登太室頂二首

王鐸

嵩嶽嶽崎一百盤中原灑氣正漫漫  
振衣法界晨鐘曙倚劍  
天門六月寒西引崑崙扶若木東窺  
滄海見靈壇撥雲禮罷  
星辰近兩袖罡風駕羽翰

會聞輦蹕上崔巍望入山河萬象開  
疊巘中天參玉柱明霞  
且書出蓬萊虎蹄忽避等源客  
龍樹長聽講法臺絕頂可憐  
無一字側身霄漢重徘徊

游嵩陽院觀漢封三栢

王鐸

嵩陽觀外栢三株漢帝遺封今記無  
翠靄尚留龍馭遠青天  
時有鶴羣呼年深飽歷風霜色世渺全荒  
玉檢符欲問興亡  
千載事不知人代幾榮枯

以上說嵩

登嵩嶽絕頂

王紫綬

呼吸天門振短袍嗟峨海內更誰豪  
畫晴東走黃河遠雲淨  
西隣華嶽高蟻垤何年城洛邑戰場終古黯成臯  
奇峰轉瞬

難圖畫擬就金壺試綵毫

獨倚中天覽大荒西來秋色更蒼蒼  
日翻木葉紅千頃雨過芙蓉翠幾行  
玉女牕櫺惟皎月漢皇輦路滿清霜  
回看磴道深無際轉欲凌風度鐵梁

嵩遊吟

洛陽懷古

盛符升

風雨當年卜帝鄉土中還倚上游強  
澗瀍合處開雙闕河洛分來會北却何地  
南宮臨逝水誰家西苑帶斜陽山川不共  
興亡異天外嵩高對渺茫

洛陽

顏光敏

城闕蕭森望洛陽西來瀍澗水湯湯  
千山紫翠朝中嶽萬古

歌鐘對北邙故國何人憑險阻皇天有意閱滄桑可憐賈傅  
今祠廟吳楚蒼生幾戰場以上別裁集

游少林寺

毛奇齡

少室諸天天際開翻經一上魏王臺幽崑風靜三花落絕磻  
泉分五乳來漢禪遠留金貝葉秦官高覆石壇槐歸雲迷却  
丹龍洞尚有閒僧坐翠苔西河集

洛陽除夕

陳維崧

五更殘臘竟歸去丈夫飄蕩仍天涯千里外人客宛雒十年  
前事愁江淮戊戌除夕在廣陵梅花空綻白馬寺柳葉漸放銅駝街  
此間今日無劇孟安能從汝談胸懷湖海樓集

洛陽懷古

李因篤

賈傅風流絕世姿上書流涕為明時楚江蘭芷悲相弔梁苑  
驂騑失所之緒論累朝開霸王深宮前席戀恩私卽山雒水  
東來道白日青春耀汝辭受祺堂集

賈太傅祠

汪楫

端賴吳公說賈生少年猶幸早成名蕭曹有命稱賢相絳灌  
柯知只老兵學到離騷難作達人能痛哭豈無情遭逢如此  
還淪落遺像空留夾馬營

謁強項侯祠

汪楫

狡兔曾知卧虎威直將熱血灑彤闈蒼頭未可汚公主天子



真難較白衣百戰荒城餘俎豆一間茆屋走蚍蜮由來強項  
無輕舉巖鼠當前肯發機

安樂窩

汪楫

安樂先生一世豪拓開宇宙走蓬蒿獨將肝肺收春氣時與  
羲皇共濁醪花鳥有情隨浩蕩山河無地可牢騷到來直似  
靈光殿金谷華林歎爾曹

伊闕

汪楫

山石曾經綫溜穿休論是鑿是天然東都定合開雙闕伊水  
應來滙百川佛坐斷崖雲汨汨風迴深河鼓淵淵彫鏤費盡  
皇宮力只恐難同禹蹟傳

香山

汪楫

好風無復起香塵倦客還來坐綠茵自昔佳名因蔓草於今  
勝地屬詩人崩崖偏許塔雙峙裂石固知龍不馴似為侍郎  
開氣象共將大力掃荆榛

以上悔齋集

會善寺二首

潘耒

蘭若端居二室中臨箕俯穎勢清雄唐碑字字金鑿壁宋栢  
枝枝翠掃空壇古嶽神曾受戒僧高列帝每趨風祇今法運  
衰頽日猶喜滹沱一線通

院主夫隱是濟宗人

地迴林深六月寒停車盡日此盤桓閑徵法系捫碑辨靜把  
嵩書映月看半榻松風清辟夢三匙粟飯軟加餐大千掌果

河南府志 卷之二十一  
分明見始信維摩丈室寬

登嵩山絕頂三首

潘耒

行窮碧磴與丹梯直上天門路不迷涼冷入新餐沈澹孤高  
杖可撥雲霓迴看鳥道南峰伏側睇蓮花少室低聖世不言  
封禪事荒寒御路草生齊

不辭觸熱上嵩巔欲遣雙眸盡八埏翠嶺千重包堯塞黃河  
一線下秦川長安遠隔浮雲外鄉國微分匹練邊清嘯一聲  
鸞鶴應隨風飄去落何天

遙呼玉女進霞杯獨立中天萬仞臺城郭平臨攢蟻垤澗泉  
直下走轟雷輪囷雲自封中起縹緲笙從鶴背來乞與神丹  
教駐景願同伯壽上千回

石淙

潘耒

何意陂陀坂阜間忽逢米老袖中山石依湍勢爲巖洞水激  
峰根作珮環割得武夷清一曲分來龍渚翠雙鬟金輪鐫刻  
爲山厄猶喜梁公句未刪

洛中詠古四首

潘耒

嵩卽環抱洛潌紆表裏山河識舊都族姓千年人質厚桑麻  
萬井土膏腴平分晷影調寒燠輻輳梯航便轉輸定鼎由來  
非一地宅中終是古規模

曲水華林跡總平六街三市蔓縱橫官殊唐宋無留守地歷

金元失禁城今城北古蟻賊躡來多戰壘劫灰過後少耆英

牡丹移種金松朽那得園池尚有名

野客無端感夢華隋宮唐院鬪豪奢游龍流水通侯第語鳥

名花上相家運去銅人辭漢殿時移玉盃出塵沙銜之莫換

伽藍記多恐金仙也嘆嗟

太平時節退休人慣住嵩陰與洛濱白傅宮僚原散吏溫公

書局亦閑身水南高士遺榮早擊壤先生味道親千載風流

如可卽勞勞真慎素衣塵以上遂初堂集

中峯

葉封

峻極中峯此獨尊雲低咫尺暗天門路迷仙館孤池在煙斷

黃河一線昏封禪有壇虛月色搗衣向石見秋痕不知山頂

誰剗削今古初無半字存嵩遊草

雨後遊箕山

傅景星

東郊細雨濕征衣磴道盤迴入翠微寺古無僧花自發松深

有路鶴先歸寒泉聲裏聞清梵危石橋邊淡落暉十載心期

今赴約相逢莫漫又成違縣志

洛陽

梁佩蘭

客居寥絕少人尋只有詩僧共少林中嶽氣生朝日濕黃河

聲應夜鐘深瓜分地勢蟠如腹尺度天文界在心無限興亡

無可說一春閒對牡丹吟六瑩堂

洛陽懷古

吳 及

天中貯鼎自前周形勝真乘萬里優龍首西通子午谷鴨頭  
東下甲庚茫茫冠蓋松杉積渺渺樓臺月霧浮惟有大河  
將洛水年年無恙作長流別裁集

趙豐原太守招遊龍門香山

湯右曾

賓游聯騎出城闌山水佳時氣色新底用清商隨一部不須  
明月作三人餘霞似綺連嵩少殘雪如花舞洛濱多謝風流  
賢太守十分先借水邊春

元日發鞏縣

湯右曾

香山四面碧嶙峋且免車中邑邑人殘雪未消前度臘寒梅

已帶乍回春老知時節心情減聞覺風花景物親二十年來

兩元日天門頂上洛河濱

丁丑元日舟次白沙村登天門山絕頂

送履公往住香山寺

湯右曾

此心宿火撥寒灰旛動鈴鳴日幾回雪裏依然吳會別

丙寅冬訪

師半塘寺留止旬日夢中曾自洛陽來任飛白鶴先提錫欲飯青猿已

築臺師到諸天合歡喜百千萬億閣門開

香山寺予所重建也前詩未盡意

復作一首

湯右曾

金碧何從問劫灰伊川勝槩挽仍回恍從禪老浮杯去可憶  
檀那獻座來留客堂寬臨石壁飯僧田薄倚香臺只應徧種

菩提樹寺少樹故云

寶藏千花次第開

上清宮

湯右曾

柱下遺文屬老成神宮千載祀周京空山日出生虛白遠水  
雲開見太清松古會棲緱嶺鶴鐘殘猶聽上林鶯乾坤消息  
歸芻狗不見關門紫氣生

東京形勢尚依然西去猶龍不復還仙李虛無朝獻禮猗蘭  
悠遠降靈年客來函谷秋風裏雁去王城夕照邊不見尼山  
車馬跡空令遺史到今傳

伊闕懷古

湯右曾

何年伊闕奠東京忽愴登臨萬古情山斷似存神禹跡天濤  
猶見洛陽城水樓風靜孤帆去石室雲深一磬鳴欲問元公

舊祠宇憑欄滿眼暮烟生

以上懷  
清堂集

懷擬山園二首

王無咎

西園曉色北邙齊舊日逍遙一杖藜十畝琅玕烟上下一欄  
花雨屋東西蛟龍畫出黃塵黯鐵馬雲屯白日低今昔園林  
休悵望禿鶯飛盡鷓鴣啼

小徑茶煙接畫廊練塘春色靜季芳林巒一帶經新眼金谷  
依然豈故鄉此地壯遊纏畫戟昔季歌舞剩斜陽家山處處  
幽紅閉宿莽弓沙幾雁行

晴嶽  
山詩

登嵩嶽絕頂

焦欽寵

嵩山山勢鬱蒼蒼坐控中原俯大荒交會陰陽留日影升沈

歲月老滄桑西連秦嶺通函谷東撼黃河走汴梁不是登高  
能作賦探竒弔古興偏狂

峻極嵩高四望雄中原灝氣麗天中西連華嶽三峯渺下矚  
黃河一線通想像宸遊傳漢帝追隨石室訪仙翁誰知老我

還能健搔首重來問碧空

楞林詩存

澗瀍

呂履恒

想像元公卜澗瀍東征萬里靜烽烟殷墟欲秀宮前麥嵩岳  
遙開石上蓮五等公侯朝覲地中原風雨會和年於今匹馬  
經行處荒冢纍纍夕照邊

賈太傅祠

呂履恒

賈生祠宇郡城隈日暮停車披草萊秋水不知年少去寒花  
偏傍洛陽開沅湘自古應同恨絳灌何人豈愛才我為招魂  
歌楚些鳳凰千仞好歸來

洛陽春興八首

選二首

呂履恒

曉日關城思寂寥元公遺廟在青霄澗瀍春水環沙嶼郊廓  
雲山帶石橋盟府丹書悲舊社戰場金鐵認前朝孤臣碧血  
千秋在歌哭蒼天恨未消

謂先太傅

極自愁登萬仞臺隋宮晉闕總蒿萊羊車月下遊何處龍舸  
天津去不回西苑花殘春雨暗北邙松盡戍烟開可憐十代  
園陵在寒食誰澆酒一杯

洛陽秋思八首 選三

呂履恒

鐵嶺金鏞指顧中，龍飛虎眇昔何雄。  
鼎圖沉水疑周甸，仙淚零鉛憶漢宮。  
霜際曉鐘山寺白，日邊殘角戍樓紅。  
澗瀍猶是元公卜，今古虛傳婁敬功。

酒市相逢遊俠兒，金尊玉管醉醪醑。  
田橫義重三齊日，劇孟名高七國時。  
青草古城嘶牧馬，白楊荒冢宿寒鴟。  
何如巢許箕山上，脫屣人間萬乘資。

西風落木下孤城，今古人同遲暮情。  
三市塵沙淹夕照，兩宮砧杵斷秋聲。  
縱橫無地憐蘇子，神鬼何知問賈生。  
寂寞鴻都同見絕，十年愁思賦東京。

原陵

呂履恒

原陵古殿凜清秋，尚有炎光史冊留。  
一夕故人同偃卧，百年名士見風流。  
巢空鸛鶴松杉老，蘚護蛟龍鬣屨幽。  
莫向南陽望佳氣，五雲縹緲自生愁。

夷齊祠 孟津扣馬處

呂履恒

大道遙瞻孤竹祠，清風激越晚林悲。  
曾孫已協天人應，義士猶懷虞夏時。  
斷岸黃河還舊渡，荒原秋日自穹碑。  
當年白馬賓王頌，何似西山易暴詩。

黑石關

呂履恒

巖關東望意蕭騷，石立山開見古濠。  
曉樹片帆回洛汭，霜天

一雁下成臯人家雨後黃沙靜戰壘秋空白日高底事棄繻猶履躄三年重過問村醪

宜陽

呂履恒

宜陽城外路漫漫晚靄空山不忍看清洛帆陰隨遠照錦屏松色入高寒鳥啼斷壘風初急馬度荒原雪未乾見說甘棠依舊在祇今南雅半凋殘

錦屏山

呂履恒

白鹿仙人返碧空名山千載憶元工石門寒氣朝昏變大壑松聲遠近同瑤瑟夜清悲素女金函晨下授青童祇今河海方清晏莫使登臨泣路窮以上夢月巖集

伊闕懷古

查昇

聚成金碧散成灰甲子循環十五回白傳因緣他劫種清公餅盃後身來千塔影浮香界八節灘聲上砌臺移得北巖松栢動此山面目定重開別裁集

伊闕懷古

汪士鋐

此生甘分作寒灰合向空山去不問當日石樓常獨往他年彌勒笑重來閒書經藏堂中記徧上龍門寺裏臺好剩半弓屋角地茅齋待我拂塵開退谷集

賈太傅祠

查嗣璫

陳書痛比秦庭哭作賦情同楚奏哀已遣長沙憂不返如何

河南府志

卷之二十一 藝文志

四

詩六



宣室召空回身逢明主猶嗟命天奪中年亦忌才此日題詩  
還下拜也如君弔屈原來

查浦詩鈔

洛陽有感

張衍懿

千古爭傳定鼎勞澗瀍無恙拱神皋西來風雨連熊耳東去  
雲山控虎牢曾見桐圭分帶礪可憐朱邸委蓬蒿只今司馬  
忠魂在夜夜陰風泣戰袍

別裁集

河南道中

鄭日奎

風沙蒼莽不知程竟日荒郊客感生甘載兵戎經百戰幾家  
煙火聚孤城斷垣雨印狐狸迹中澤霜淒鴻雁聲待擬繪圖  
嗟未可軍書昨復報南征

別裁集

遊上清宮

劉青藜

北邙山上翠雲峯古殿猶存老子容人道入關真有氣我疑  
問禮喚猶龍神堯開國傳孫子仙李盤根認祖宗碧瓦金莖  
何處是笑看鐵柱倚青松

香山寺懷白傅

劉青藜

履道長歸不論貧洛陽城裏最閑身從將遺老招同社時與  
高僧作近鄰十寺煙消餘馬鬣八灘風急感魚鱗須知白傅  
饒風骨不似微之易染塵

謁賈長沙祠

劉青藜

森森檜栢起悲風賈傅祠堂悵望中從問鬼神勞漢帝深交

絳灌笑蘇公苔荒曲徑門常掩燕去雕梁壘自空莫怪投文  
弔湘水椒蘭遺恨古今同

登鞏縣城樓

劉青藜

獨上城南百尺樓山川迴合古東周螭碑萬笏插龍尾雉堞  
千尋跨虎頭洛口倉空餘故壘平津橋斷冷荒洲東風楊柳  
垂垂綠極目斜陽動客愁

以上高陽山人集

登錦屏山

呂謙恒

錦屏屹立俯平原玉柱峯前紫閣尊北望雲霞浮洛浦東來  
蒼翠接嵩門雪殘松壑餘寒氣日落山城動遠昏瑤草金光  
今寂寞清笳何處正銷魂

青要集

賈傅故宅

顧嗣立

治安策上衆狺狺謫向長沙卑濕濱生遇漢文猶痛哭放同  
屈子竟亡身洪鑪久已爲銅炭宣室何勞問鬼神絳灌不知  
才子貴漫輕年少洛陽人

別裁集

登小嵩頂二首

顧嗣立

太室荒塗不可尋支節岳廟且登臨金壺墨謁仙經化玉鏡  
塵昏美石沈雨過羣峰光合沓秋生萬木氣蕭森那堪夜靜  
清輝滿玉女無聊急莫砧

白少傅墓

顧嗣立

樂天却不占東坡只戀香山墓薜蘿宦興蘇杭新句好老年

仙佛宿緣多崔兒喪後空敦恨元相亡來剩輓歌惆悵龍門  
經藏散洛中十卷竟如何以上嵩岱詩集

嵩頂

李來章

層穿綠樹上丹梯崑烟嵐望欲迷虛窟雲含千嶂雨垂崖  
石厓萬山低春留岩際花仍艷風定林中鳥自啼但有新詩  
吟卽境鴻濛灑氣迥難題

謁中岳廟

李來章

層巒疊嶂盡朝宗閣殿開當第一峯鸞鶴有時隨節鉞烟嵐  
鎮日護山龍升騰雲雨先羣岳鍾毓英賢佐九重肅將微誠  
憑對越冥冥浩氣豁心胸以上遊嵩草

永寧龔元玉以書及詩來云趙清獻嘗爲其邑令城北  
故有祠今廢不存邑人以今佟明府青士導洛疏渠民  
賴其利欲立二賢祠于鳳翼山麓致崇報之意而以募  
疏見委余辭不能作此答之

全軌

誰向名山網舊聞比來方志益紛紜焉知葉縣郎官碣永寧城東  
有清獻舊治碑考本傳神道碑皆不載令永寧事不似香山居士墳白太傅墓在洛陽而永寧舊志  
列陵墓中功德自宜秦守廟秦蜀郡太守李冰游揚何用楚人文青芻白  
飯空相憶何處天涯悵暮雲真志堂集

洛陽

商奕驥

洛陽東去草芊芊幾見耕奴斫墓田夜月魂啼誰氏塚西風

人喚渡頭船陳思稅駕旋成夢子晉吹笙便作仙自笑勞勞  
鉛汞客至今猶在藥爐前趙風

嵩縣道中

張漢

拂烟掠翠出晴川笑領風光客路前細草平鋪春水色桃花  
欲醉夕陽天尋村樹掩雲中徑畫井人耕陌上田不是垂鞭  
行不進玉驄也為惜芳妍月樵詩集

洛陽

商盤

懷古曾停攬勝車三川佳麗近何如婆娑九老衣冠盡睥睨  
中原戰鬪餘洛水嵩雲春浩渺漢陵宋闕晚蕭疎棘都好續  
名園記長使興亡感廢墟寶意詩集

望嵩山

張琦

崑崙水下歷宏農山壓黃河嶺萬重九貢版章稱腹土五宗  
岱嶽號中峯室呼太少凌霄漢秩視公侯動鼓鐘西眺秦關  
東洛泮蒼茫天半落芙蓉續通志

洛陽

孟駉

環樞拱極應中天伊洛龍門會澗瀍魑魅跡迷周鼎沒蒲牢  
聲吼洛鐘懸水流交甫明珠浦草長蘇卿負郭田此地興亡  
翻覆手津橋切莫聽啼鶻荀莊詩鈔

登嵩高

郜錦

放步嵩高最上頭晴光萬里望中收西臨華嶽三峯直北俯

黃河一線流嵐趁輕霞凝翠幙雲迎曉日結層樓天池嵩頂有天  
池勺水題詩罷乘月還同玉女遊詩存

劉文靖健故里

嚴遂成

二公鼎鼐調和地翊贊無如少主昏善斷固應推宋璟反攻  
幾至殺陳蕃諫書淚漬金滕冊奸黨名刊端禮門居洛人思  
重入相廿年顧命荅明恩明史雜詠

緱山

恭和聖製元韻

劉綸

抗手何人鶴背連地行爭解豔神仙縱知是事言荒畧已覺  
茲山意邈繇嶺度玉笙通少室池分丹水熟平田吾  
皇道法超元契不錄西崑閨苑篇

嵩陽書院

恭和聖製元韻

劉綸

戰外初聞絃誦清一區山館舊知名岩頭玉塞延朝爽澗底  
黃華弄晚英表界樹存枯復活封函雲起雨兼晴尊經閣下  
簪臺客八咏觀看 欵唾成

祀嶽廟

恭和聖製元韻

劉綸

望祭宵來吉玉懸降神當日仰中天卽占裸薦 心願若奚  
羨登封意倏然九野星辰光有耀兩河風雨氣無偏升歌一  
闕追周雅他日高文樂府宣以上繩廡內集

河南府志卷之一百二

藝文志二十六

詩七 五絕

唐

入朝洛堤步月

上官儀

脈脈廣川流 驅馬歷長洲 鵲飛山月曙 蟬噪野風秋

嵩山夜還

宋之問 一作李頎

家住嵩山下 好采舊山薇 自省遊泉石 何曾不夜歸

九日進茱萸山詩

選一首

張說

居洛陽下 舉目見嵩山 刻作茱萸節 情生造化間

題龍門寺

陸海

窗燈林霽裏聞磬水聲中更與龍華會爐煙滿夕風

雜詩三首

王維

家住孟津河門對孟津口常有江南船寄書家中否

君自故鄉來應知故鄉事來日綺窗前寒梅著花未

已見寒梅發復聞啼鳥聲心心視春草畏向堦前生

洛陽道五首獻呂四郎中

儲光義

洛水春水開洛城春水綠朝看大道上落花亂馬足

孟不知名千金買寶劍出人平津邸自言矯且艷

直如變春日佳氣多五陵貴公子雙雙鳴玉珂

二月時道傍柳堪把上枝覆官路

洛水照千門千門碧空裏少年不得志

洛中訪袁拾遺不遇

洛陽訪才子江嶺作流人聞說梅花早何處先地春

同儲十二洛陽道中作

珠彈繁華子金羈遊俠人酒酣白日暮走馬入

洛陽陌

李益

白玉誰家郎回車渡天津看花東陌上驚動洛陽人

洛陽陌二首

顧况

鶯聲滿御隄隄柳拂絲齊風送名花落香紅襯馬蹄

珂珮逐鳴騶王孫結伴遊金丸落飛鳥乘興醉青樓

天津橋望洛城殘雪

閻濟美

新霽洛城端千家積雪寒未收清禁色偏向上陽殘

上洛橋

李益

金谷園中柳春來似舞腰何堪好風景獨上洛陽橋

天津橋南山中各題一句

李益

野坐分苔席山行繞菊叢韋執中雲衣惹不破諸葛亮秋色望

來空賈島

題安甘棠館二首

劉禹錫

家池清竹徑斜山禽忽驚起衝落半巖花

門前洛陽道門裏桃花路塵土興煙霞其間十餘步

鞏路感懷

呂溫

馬嘶白日暮劍鳴秋氣來我心浩無際河上空徘徊

孟津感懷

孟雲卿

徘徊宋郊土不見平生親獨立正傷感悲風來孟津

金谷園

曹松

當年歌舞時不說草離離今日歌舞盡滿園秋露垂

洛中有懷

于鄴

潺潺伊洛河寂寞少恩波鑿駕久不幸洛陽春草多以上全唐詩

宋



和君實登石閣

邵雍

平地雖然遠那知物物新危樓一百尺別有萬般春

閒適吟

邵雍

春看洛城花秋翫天津月夏披嵩峯風冬賞龍山雪

福昌遇雨

邵雍

雲勢移峯緩泉聲度竹遲此時無限意惟有翠禽知

招司馬君實遊夏圃

邵雍

雨霽景自好秋深天未寒可能乘興否夏圃一盤桓以上擊壤集

二月六日登石閣

司馬光

千里外川原繡畫新始知平地上看不盡青春

雙石溪一首

司馬光

道傍行采藥石底卧題名野老相迎拜谿童乍見驚

山鳥勸人飲山蟬笑我狂歸時興未盡不得看斜陽以上溫公集

金

洛陽高少府瀍陽後庵五首

元好問

溪上弄明月風露發新警心空無一塵萬竹掃秋影

一水隨人意蔬畦復芋溝風波河洛近莫放出山流

韭早春先綠松肥秋未黃殷勤遶畦水終日為君忙

地僻境逾靜林疎秋已分清溪一片月修竹四山雲

方外人長樂山中物自幽百年梅福隱萬古謫仙游遺山集

元

遊嵩山十三首

楊 奐

盤盤十二曲石嶺瘦崢嶸脚底有平地何人險處行

茂陵骨已朽萬歲恐虛傳莫上中峰頂秦城隔暮煙

方若植鬼冠森若削寒玉明月夜中遊誰家借黃鵠

頑石本在世啓母人亦知可憐宋太后死罵寧馨兒

路傍雙闕老蔓草入荒祠時見山家女燒香乞繭絲

避名名自在身瘠道還腴未到千年後空巖已姓盧

壯哉昌黎筆談笑排佛禍不言動鬼神翻疑觸雷火

幾時落東溪曲折卧天漢語似登山人可飲不可盟

一片開元石愈知天地中今宵北窗夢或可見周公

土階墮渺茫多少曹與馬底事住青山近代無讓者

解后洗耳翁去飲上流水此日儻相逢黃犢應渴死

大士傳心要諸方叩道元至今卓錫地瑩徹有遺泉

既知田間樂焉知田間苦惟是唐虞朝所以有巢父

明

嵩嶺道中

王尚綱

少室山欲闕少陽水欲竭曛曛嶺外雲皎皎峰頭月

自少林過山憇清凉寺

王尚綱

寥落箕山後比隣自不凡翠嶽煙霞外田廬尚有巖

挺挺高高上雙峰幾度秋從知王子晉長揖謝浮邱以上登谷全集

洛陽

陳惟成

洛陽春雨餘夾道垂楊綠歌管綺樓人朝朝歡未足

挾彈冶遊子金丸手中把忽聽啼鳥聲勒住青驄馬舊志

寄維揚李秀才

趙綱

未得吳公薦空憐賈誼才年年三月裏相憶看花來明詩錄

洛陽

姚綬

馬上相逢處春風在洛陽陌頭楊柳色一一斷人腸洛陽志

國朝

過北邙山

施閏章

黃河渡口人北邙山下路但見冢纍纍無地栽松樹

嵩頂書壁

施閏章

二室千峰秀秋登第一峰中原歸杖底長嘯倚孤松

洛水

龐塏

洛水流自急洛水波自清雷鳴激兩岸有底大不平

晚出銅駝街

龐塏

落日東城外荒棘沒斷垣銅駝已不見况復問宮門以上雪崖集

石樓灘

湯右曾

積鐵山幽幽濺波石齒齒不見樓上人時聞灘下水懷清堂集

褚遂良墓

偃師

呂履恒

白日落豐碑青蒲事可悲死生慙顧命不敢怨昭儀

少室

呂履恒

少室橫西郭九面削芙蓉峰際落寒月城中聞曙鐘

文潞公墓

洛陽

呂履恒

抔土殘碑在猶傳宋太師葦南陵樹盡空對日斜時夢月巖詩集

初祖菴雜咏三絕

顧嗣立

一石獨亭亭中藏初祖形千季神氣在何用著丹青面壁

蟲書文剝落鳥篆字模糊好去問羅什西方有此無飛來碑

托根依淨土二祖手親植曾逢庚嶺梅歲寒不改色二祖手植

許睢陽

桑調元

九死睢陽戰飢羸不易心許公埋骨處猶自陣雲深

碑杜當陽工部墓處二首

桑調元

遠祖與聞孫文章勲業存九原相映徹都在土樓村

當陽癖春秋工部耽佳句誰知弟古人煙霞已沈痼以上張甫集

蘇秦墓

呂謙恒

白楊莽蕭森澗水流何急今日一孤墳當時存六國青要集

午橋

劉洙

午橋何所有啟戶見南山雨過嵐氣發空翠兩眉彎

綠野堂

劉洙

偶過午橋莊言尋綠野堂黃鸝既不語何處問殘陽以上洛陽志

河南府志卷之一百三

藝文志二十七

詩八 七絕

唐

登封大酺歌四首

盧照鄰

明君封禪日重光天子垂衣歷數長九州四海常無事萬歲千秋樂未央

日觀仙雲隨鳳輦天門瑞雪照龍衣繁弦綺席方終夜妙舞清歌歡未歸

翠鳳逶迤登介邱仙鶴裴回天上遊借問乾封何所樂人皆

壽命得千秋

千年聖主應昌期萬國淳風王化基請比上古無為代何如  
今日太平時英華

却山

沈佺期

北却山上列墳塋萬古千秋對洛城城中日夕歌鐘起山上

唯聞松栢聲本集

洛陽客舍逢祖詠留宴

蔡希寂

縣縣鐘漏洛陽城客舍貧居絕送迎逢君貰酒因成醉醉後  
焉知世上情全唐詩

菩提寺禁裴迪來看說逆賊疑碧池上作樂供奉人舉

聲便淚下口號示裴迪

王維

萬古傷心生野煙百寮何日更朝天秋槐葉落空宮裏疑碧

池頭奏管弦右丞集

春夜洛城聞笛

李白

誰家玉笛暗飛聲散入春風滿洛城此夜曲中聞折柳何人

不起故園情本集

詠石季倫

李清

金谷繁華石季倫只能謀富不謀身當時縱與綠珠去猶有

無窮歌舞人全唐詩

過故洛城

錢起一作白居易詩八

故城門外春日斜故城門裏無人家市朝欲認不知處漠漠野田空草花同上

金谷園

張繼

綵樓歌館正融融一騎星飛錦帳空老盡名花春不管年年啼鴉怨東風同上

宿白馬寺

張繼

白馬馱經事已空斷碑殘刹見遺踪蕭蕭茅屋秋風起一夜雨聲羈思濃同上

少室山韋鍊師昇仙歌

皇甫冉

紅霞紫氣晝氤氳絳節青幢迎少君忽從林下昇天去空使

時人禮白雲同上

送李秀才遊嵩山

顧况

嵩山石壁挂飛流無限神仙在上頭采得新詩題石壁老人惆悵不同遊同上

陪留守韓僕射巡內至上陽宮感興

竇庠

翠輦西歸七十春玉堂珠綴儼埃塵武皇弓劍埋何處泣問上陽宮裏人

愁雲漠漠草離離太乙句陳處處疑薄暮毀垣春雨裏殘花猶發萬年枝同上

洛中卽事

竇庠

高梧葉盡鳥巢空  
洛水潺湲夕照中  
寂寂天橋車馬絕  
寒鴉

飛入上陽宮

同上

過綺岫宮

東都永寧縣西五里

王建

玉樓傾倒粉牆空  
重疊青山遶故宮  
武帝去來羅袖盡  
野花

黃蝶領春風

同上

病中宿宜陽館聞雨

李約

難眠夏夜抵秋  
賒簾幔深垂窗  
燭斜風吹桐竹  
更無兩白髮

病人心到家

同上

緱山道中口號

武元衡

秋山寂寂秋水清  
寒郊木葉飛無聲  
王子白雲仙去久  
洛濱

行客夜吹笙

同上

懷伊川

李吉甫

龍門南岳盡伊原  
草樹人煙目所存  
正是北州梨棗熟  
夢魂

秋日到郊園

同上

過三鄉望女几山  
早歲有卜築之志

羊士諤

女几山頭春雪消  
路傍仙杏發柔條  
心期欲去知何日  
惆悵

回車上野橋

同上

送友人遊嵩山

陳羽

嵩山歸路繞天壇  
雪影松聲滿谷寒  
君見九龍潭上月  
草辭

清夜訪袁安

同上



送聞上人遊嵩山

歐陽詹

二室峯峯昔願遊從雲從鶴思悠悠丹梯石路君先去為上

青真最上頭同上

洛橋晚望

孟郊

天津橋下冰初結洛陽陌上人行絕榆柳蕭疎樓閣閑月明

直見嵩山雪東野集

過東都別樂天二首

樂天在洛太和中禩拜左丞自越過洛以二詩別樂天未幾死於鄂

樂天哭之曰始以詩交終以詩訣茲筆相絕其今日乎見紀事

元稹

君應怪我留連久我欲與君辭別難白頭徒侶漸稀少明日

恐君無此歡

自識君來三度別這回白盡老髭鬚戀君不去君須會知得

後廻相見無長慶集

洛陽春

白居易

洛陽陌上春長在惜別今來二十年唯覓少年心不得其餘萬事盡依然

和友人洛中春感

白居易

莫悲金谷園中月莫歎天津橋上春若學多情尋往事人間何處不傷神

龍門下作

白居易

龍門澗下濯塵纓擬作閑人過此生筋力不將諸處用登山

臨水詠詩行

王子晉廟

白居易

子晉廟前山月明人聞往往夜吹笙鸞吟鳳唱聽無拍多似  
霓裳散序聲

履道居三首

白居易

莫嫌地窄林亭小莫厭貧家活計微大有高門鑲寬宅主人  
到老不曾歸

東里素帷猶未徹南鄰丹旆又新懸衙門蝸舍自慙魏收得  
身來已五年

世事平分衆所知何嘗苦樂不相隨唯餘耽酒狂歌客只有

樂時無苦時

香山寺二首

白居易

空山寂靜老夫閑伴鳥隨雲往復還家醞滿瓶書滿架半移  
生計入香山

愛風巖上攀松蓋戀月潭邊坐石稜且共雲泉結緣境他生  
當作此山僧

洛陽堰閑行

白居易

洛陽堰上新晴日長夏門前欲暮春遇酒卽沽逢樹歇七年  
此地作閑人

過永寧

白居易

村杏野桃繁似雪行人不醉為誰開  
賴逢山縣盧明府引我花前勸一杯

和裴令公南莊絕句

白居易

陶廬僻陋那堪比謝墅幽微不足攀  
何似嵩峰三十六長隨申甫作家山

送嵩客

白居易

登山臨水分無期泉石煙霞今屬誰  
君到嵩陽吟此句與教三十六峰知

題香山新經堂招僧

白居易

風滿秋堂月滿庭香花漠漠磬泠泠  
誰能來此尋真諦白老

新開一藏經以上長慶集

和嵩陽客舍月夜憶上清人

徐凝

獨夜嵩陽憶上仙月明三十六峯前  
瑤池月勝嵩陽月人在玉清眠不眠

金谷覽古

徐凝

金谷園中數尺土問人知是綠珠臺  
綠珠歌舞天下絕唯與石家生禍胎

洛城秋砧

徐凝

三川水上秋砧發五鳳樓前明月新  
誰為秋砧明月夜洛陽城裏更愁人

和川守侍郎緱山題仙廟

徐凝

王子緱山石殿明白家詩句詠吹笙安知散席人間曲不是  
寥天鶴上聲

和秋遊洛陽

徐凝

洛陽自古多才子唯愛春風爛漫游今到白家詩句出無人  
不詠洛陽秋

見少室

徐凝

適我一簞孤客性問人三十六峰名青雲無忘白雲在便可  
嵩陽老此生

伊川晚眺

李德裕

桑葉初黃梨葉紅伊川落日盡無風漢儲何假終南客角里  
先生在谷中

曉過函谷關

李涉

因韓爲趙兩游秦十月冰霜渡孟津縱使雞鳴遇關吏不知  
余也是何人

洛中作

張祐

元和天子昔平戎惆悵金輿尚未通盡日洛橋閑處看秋風  
時節上陽宮

洛中感事

雍陶

洛城今古足繁華最恨喬家似石家行到窈娘身沒處水邊

愁見亞枝花

天津橋望春

雍陶

津橋春水浸紅霞  
煙柳風絲拂岸斜  
翠輦不來金殿閉  
宮鶯銜出上陽花

以上全唐詩

題壽安縣甘棠館御溝

杜牧

一渠東注芳華苑  
苑鎖池塘百歲空  
水殿半傾蟾口澀  
為誰流下蓼花中

洛陽秋夕

杜牧

泠泠寒水帶霜風  
更在天橋夜景中  
清禁漏閑煙樹寂  
月輪移在上陽宮

洛中二首

杜牧

柳動晴風拂路塵  
年年宮闕鎖濃春  
一從翠輦無巡幸  
老却蛾眉幾許人

風吹柳帶搖晴綠  
蝶遶花枝戀暖香  
多把芳菲泛春酒  
直教愁色對愁腸

金谷園

杜牧

繁華事散逐香塵  
流水無情草自春  
日暮東風怨啼鳥  
落花猶似墮樓人

以上杜牧之集

緱山廟

許渾

王子吹簫月滿臺  
玉簫清轉鶴裴回  
曲終飛去不知處  
山下

碧桃春自開

金谷園

許渾

三惑沈身是此園古藤荒草野禽喧二十四友一朝盡愛妾  
墮樓何足言以上丁卯集

東還

李商隱

自有仙才自不知十年長夢採華芝秋風動地黃雲暮歸去  
嵩陽尋舊師

涉洛川

李商隱

通谷陽林不見人我來遺恨古時春宓妃漫結無窮恨不為  
君王殺灌均以上義山集

新安故關

孟遲

漢帝英雄重武材崇山險處鑿門開如今更有將軍否移取

潼關向北來全唐詩

伏牛山

薛能

虎蹲峰狀屈名牛落日連村好望秋不為時危耕不得一犁

風雨便歸休同上

經蘇秦墓

賈島

沙埋古篆折碑文六國興亡事繫君今日淒涼無處說亂山

秋盡有寒雲浪仙集

洛陽

溫庭筠

河內府志

濟南府志 卷之三十三  
鞏樹先春雪滿枝上陽宮柳轉黃鸝桓譚未便忘西笑豈爲  
長安有鳳池飛卿集

懷古詩

汪遵

薄世臨流洗耳塵便歸雲洞任天真一瓢風入猶嫌鬧何況  
人間萬種人箕山

晉臣榮盛更誰過常向堦前舞翠娥香散豔消如一夢但留  
風月伴煙蘿金谷

大抵花顏最怕秋南家歌歇北家愁從來幾許如君貌不肯  
如君墜玉樓綠珠

水泉花木好高眠嵩少縱橫滿目前惆悵人間不平事今朝  
身在海南邊題李太尉平泉莊

西秦北趙各稱高池上張筵列我曹何事君王親擊缶相如  
有劍可吹毛灑池

洛陽詠古

司空圖一作胡曾

石勒童年有戰機洛陽長嘯倚門時晉朝不是王夷甫大智  
何由得預知

洛中三首

司空圖

秋風團扇未驚心笑看妝臺落葉侵繡鳳不教金縷暗青樓  
何處有寒砧

不用頻嗟世路難浮生各自繫悲懽風霜一夜添羈思羅綺

誰家待早寒

燕巢空後誰相伴  
鴛被縫來不忍薰  
薄命敢辭長滴淚  
倡家未必肯留君

宿洛都門

張喬

山川馬上度邊禽  
一宿都門永夜吟  
客路不歸秋又晚  
西風吹動洛陽砧

懷古詩四首

胡曾

一自佳人墜玉樓  
繁華東逐洛河流  
唯餘金谷園中樹  
殘日蟬聲送客愁

金谷園

寂寂箕山春復秋  
更無人到此溪頭  
棄瓢巖畔中宵月  
千古

空間屬許由

箕山

日照荒城芳草新  
相如曾此挫強秦  
能令百二山河主  
便作樽前擊缶人

樽前擊缶人

池

古墓崔巍約路岐  
歌傳薤露到今時  
也知不共朝黃屋  
祇爲曾烹酈其食

田橫墓

歎平泉

羅鄴

生前幾到此亭臺  
尋歎投荒去不回  
若遣春風會人意  
花枝盡合向南開

定鼎門

褚載

邾鄆城高門倚天  
九重蹤跡尚依然  
須知道德無關鎖  
一閉



乾坤一萬年

題三鄉詩 并序

若耶溪女子

余家本若耶溪東與同志者二三紉蘭佩蕙每貪幽  
 閑之境翫花光於風月之亭竟晝綿宵往往忘儼海  
 乎初筭五換星霜矣自後不得已從良人西入函關  
 寓居晉昌里第其居迴絕塵囂花木叢翠東西隣二  
 佛宮皆上國勝游之最伺其閑寂因游覽焉亦不意  
 一時之風月也不意良人已矣貌然無依帝里芬香  
 弔影東邁涉澹水歷渭川背終南陟太華經灃驛  
 陝郊挹嘉祥之清流面女几之蒼翠凡過之跡皆曩  
 昔燕笑之地銜冤茹歎舉目魂銷雖殘骸尚存而精  
 爽都失假使潘岳復生無以悼其幽思也遂命筆聊  
 題終不能滌其懷抱絕筆慟哭而去時會昌壬戌歲  
 仲春十九日二九子為父後玉無瑕弁無首荆山石  
 有題 往往

昔逐良人西入關良人身歿妾空還謝娘衛女不相待為雨

為雲歸此山

彤管遺編云若耶溪女隱名不書後李舒解之曰二九十八十加八木字子為父後木下子李

字也玉無瑕去其點也弁無首存其廿也王下廿弄字也荆山石往往有者荆山多玉當是姓李名弄玉也

和三鄉詩

會昌時有女子題詩三鄉驛和者十人

陸貞洞

惆悵殘花怨暮春孤鸞舞鏡倍傷神清詞好箇干人事疑是

文姬第二身

和三鄉詩

劉谷

蘭蕙芬香見玉姿路傍花笑景遲遲苧蘿山下無窮意併在

三鄉惜別時

和三鄉詩

王祝

女几山前嵐氣低佳人留恨此中題不知雲雨歸何處空使

王孫見即逃

和三鄉詩

王滌

浣沙游女出關東舊跡新詞一夢中槐栢柳亭何限事年年  
迴首向春風

和三鄉詩

韋冰

來時歡笑去時哀家國迢迢向越臺待寫百年幽思盡故宮  
流水莫相催

和三鄉詩

李昌鄰

紅粉蕭娘手自題分明幽怨發雲闈不應再學文君去泣向  
殘花歸剡溪

和三鄉詩

王頌

無姓無名越水濱芳詞空怨路傍人莫教才子偏惆悵宋玉  
東家是舊鄰

和三鄉詩

李縞

會稽王謝兩風流王子沉淪謝女愁歸思若隨文字在路傍  
空為感千秋

和三鄉詩

張綺

洛川依舊好風光蓮帳無因見女郎雲雨散來音信斷此生  
遺恨寄三鄉

和三鄉詩

高衢

詩八

南北千山與萬山軒車誰不思鄉關獨留芳翰悲前跡陌上恐傷桃李顏以上全唐詩

五代

嶠嶺四望

許鼎

漢家仙仗在咸陽洛水東流出建章野老至今猶望幸離宮

秋樹獨蒼蒼同上

宋

題洛陽華嚴院楊少師書壁後

李建中

杉松倒澗雪霜乾屋壁麝煤風雨寒我亦平生有書癖一回入寺一回看蔡寬夫詩史

題菩提寺

李建中

龍門雙闕湧雲烟雪未飛花雁下前徹底清流照軍馬分臺

御史過伊川能改齋漫錄

題王子晉祠

鄭文寶

秋陰漠漠秋雲輕緜氏山頭月正明帝子西飛仙馭遠不知

何處夜吹笙西清詩話

對竹思鶴留守西洛日作

錢惟演

瘦玉蕭蕭伊水頭風宜清夜露宜秋更教仙驥傍邊立盡是

人間第一流能改齋漫錄

題鞏縣西門周襄王廟

晏殊

人來人去市朝變山後山前煙霧凝縈帶二川河洛水寂寥  
千古帝王陵王荆公詩註

澠池道中

韓琦

渡澗登坡直幾重嶺頭初日上曛隴野花紅紫連官道露裊  
清香散曉風安陽集

和龍門曉望

歐陽修

水霧濛濛曉望平悠然驅馬獨吟行煙嵐明滅川霞上凌亂  
空山百鳥驚文忠集

書堯夫首尾吟卷後

富弼

黎民於變是堯時便字堯夫德可知更覽新詩名擊壤風花

雪月一兼之文忠集

雙泉

文彥博

長劔並彈霜氣豪白虹半折秋雲高濯纓洗耳更何處世人  
回看輕鴻毛路公集

過故洛陽城二首

司馬光

四合連山繚繞青三川滉漾素波明春風不識興亡意草色  
年年滿故城

煙愁雨嘯奈華生宮闕簪裾舊帝京若問古今興廢事請君  
只看洛陽城

洛陽看花

司馬光

洛陽春日最繁華紅綠陰中十萬家誰道羣花如錦繡人將錦繡學羣花

王安之以詩二絕見招作真率會光以無從者不及赴依韻和呈

司馬光

真率由來無次第經旬踰月不爲稀藍輿但恨無人舉坐想紛紛醉落暉

杯盤豐腴勝陶令園沼繁華減白家惆悵佳辰掩蓬蓽不陪高會賞鄰花

招君從安之正叔不疑南園爲真率會

司馬光

榆錢凌亂柳花飛枝上紅英漸漸稀莫厭銜杯不虛日須知共力惜春暉

真率春來頻宴聚不過東里卽西家小園容易邀嘉客饌具雖無亦有花

自澠至洛循穀水行百餘里

司馬光

已煩穀水遠相送更得嵩峯遙見迎水碧峯青看未足却愁前到洛陽城

過堯夫天津居

司馬光

草軟波清沙徑微手携筇竹着深衣白鷗不信忘機久見我猶穿柳岸飛

邵堯夫許來石閣久待不至

司馬光

淡日濃雲合復開碧嵩清洛遠縈迴林端高閣望已久花外  
小車猶未來

和范景仁遊壽安

司馬光

宜陽城下作遊人都為衣冠不繫身衆竅怒號成地籟也勝  
終日在紅塵

噴玉潭

司馬光

千尺崖頭一派清古今不絕墜崢嶸長風卷起散巖壑此日  
方知噴玉名

二十六日作真率會伯康與君從七十八歲安之七十  
七歲正叔七十四歲不疑七十三歲叔達七十歲光六

十五歲合五百壹拾伍歲口號成詩

司馬光

七人五百有餘歲同醉花前今古稀走馬鬪雞非我事紵衣

絲髮且相暉

樂天九老詩云七人五百七十歲

經春無事連翩醉彼此往來能幾家切莫辭斟十分酒儘從

佗笑滿頭花

以上溫公集

履道留題

邵雍

何代無人振德輝衆賢今日會西畿太平文物風流事更勝  
元和全盛時

和王安之少卿同遊龍門

邵雍

數朝從款看伊流夜卜香山宿石樓會有涼風開遠意更和

烟雨弄高秋

天津橋

邵雍

淙水悠悠際碧天  
平蕪更與遠山連  
白頭老叟心無事  
閑凭欄干看洛川

神林谷

邵雍

並轡同遊疊石溪  
斷崖還合與雲齊  
飛泉亦有留人意  
肯負他年到此棲

安樂窩

邵雍

半記不記夢覺後  
似愁無愁情倦時  
擁衾側卧未欲起  
簾外落花撩亂飛

和司馬君實過天津居

邵雍

風背河聲近亦微  
斜陽淡泊隔雲衣  
一隻白鷺來烟外  
將下沙頭卻又飛

遊嵩山

程頤

鞭羸百里遠來遊  
數日陰雲暝不收  
遮斷好山教不去  
如何天意異人謀

歸洛寄祖擇之龍圖

呂公著

恩深骨髓為慈親  
義重邱山是故人  
歸過嵩陽舊遊地  
白雲收得薜蘿身

洛陽觀花

張嶠

平生自是愛花人到處尋芳不遇真祇道人閒無正色今朝  
初見洛陽春王直方詩話

蘇秦

王安石

已分將身死勢權惡名磨滅幾何年想君魂魄千秋後却悔  
初無二頃田

賈生

王安石

一時謀議畧施行誰道君王薄賈生爵位自高言盡廢古來  
何啻萬公卿以上荆公集

洛城雜詩五首

韓維

分從柳外揚鞭去同作花前載酒行題得新詩無處寄雜英

飛絮滿春城

楊寺丞持詩見尋不遇

洗馬澗邊芳樹密欄干仍在碧流西香檀亂拍朱絃急應有

遊人醉欲迷

洗馬澗

上東門外春三月桑葉陰陰覆菜花密竹亂流行逕絕桔槔

鳴處是人家

上東門外

無數長條亂曉風誰將紫錦覆春叢殘英點落青苔面獨倚

朱欄細雨中

府署紫錦帶花

櫻桃園裏鳴禽亂獬豸池邊積草多七十年前繁盛地曲蹊

深隧見張羅

會節園

陪晏相公遊韓王水磴園

韓維

詩八



行遍洛川南北岸自憐探賞頗窮幽不知物外清閑境只在

韓王水磴頭以上南陽集

嵩山二十四詠 并序

樓 異

僕性嗜山水幾成癖所至雖假館舍莫不聚拳石環斗池終日玩觀殆忘食寢一旦來令嵩陽正在清泉白石中始至數月訟庭清暇乃芟廢圃鑿芙蓉菴舊二池取餘土築臺高五丈許名之揖仙北面嵩嶽西顧少室南望許由自餘諸峯環擁軒檻于是居高遠眺盡山川之形勢暇日既作三十六峯賦以自廣然僕舊聞嵩山二十四峯圖經傳記所不載求之士人亦莫知也一日觀明太師李得柔勝之自京師來訪迺得其名出道藏吳天師靈跡記歷東而西一一可指遂命畫史圖諸峯於仰嵩堂以證其名僕謂勝之曰二十四峯之名湮沒久矣今自吾二人者發之不可無述也乃作嵩山二十四詠並命勝之作焉

斬新高髻掠雲開翠色羅衣一樣裁知有真仙此中住故命

天女捧書來青童峯

一片黃雲駐不飛中天帝子欲何知不須更問玉人事自有

嵩高峻極詩黃蓋峯

蓬知方丈與瀛洲塵世紛紛漫白頭不到嵩山最高處世人

萬易揖浮邱邱

昔有仙翁住此間煉成青髮與朱顏一朝跨鶴昇天去澗草

巖花豈復攀三鶴峯

漢家天子學神仙曾遇真人耳過肩不待萑蒲長黑髮須知

逸樂自延年遇聖峯

仙仗西來感百神泥金檢玉尚如新山靈知是真天子萬歲

聲中第一人萬歲峯

皎皎冰盤瑩百圍廣寒宮殿見依稀青山萬疊渾如洗浮翠

光中一鏡飛玉鏡峯

蒼苔藤蔓飾鬚眉獅子標形是與非果解噴呻作哮吼窟中

狐兔定魂飛獅子峯

萬里封侯相不知道人曾此獲陰符軒牙露舌驚樵採猛士

還當捋爾鬚虎頭峯

觸石孤飛一葉蓬雷公電母晝鞭龍但知四海為霖雨不道

中天第幾峯起雲峯

當年翔鳳此徘徊曾為真人覽德來今日飛鳴天外過紛紛

燕雀不須猜鳳凰峯

想見金壺瀉墨河皂林餘潤鬱嵯峨伯陽當日傳經後肯向

山陰與換鵝金壺峯

華蓋峯高未易窮捫參歷井到天中回頭却顧人間世但見

羣青似小童華蓋峯

元武名峯古所傳晨昏吐氣作雲煙雖無鑽灼剗腸患歲晚

風霜亦可憐元龜峯

頭角低回蘚蔓封蜿蜒端似卧真龍早乾歲禱多靈應時見

油雲出此峯卧龍峯

鶴乘雲輶下九天主盤星子竟誰先相應漢武題花品留作

人間聚八仙

會仙  
三

當年曾悟鏡中形道骨仙風擬紫冥二十四峯明月夜玉笙

須向揖仙聽

子晉  
峯

丹楹未羨人間俊玉柱一峯天外高自古大材須大用扶持

廣廈豈辭勞

玉柱  
峯

翳霧埋雲皓首翁難將書傳考前蹤商山羽翼朝天後化作

中天一石峯

老翁  
峯

漢武求仙未得仙玉人何事落峰前故知帝子乘雲下神蓋

峯頭啟洞天

玉人  
峯

玉仙曾此駐雲車日薄臈紗映雪膚七字天書人不辨定知

元女手中符

玉女  
峯

孕玉懷金不待媒翫然佳氣罩崔嵬天教秀拔諸峯上未信

狂飈解折摧

獨秀峯或  
云金匱峯

翠幄籠雲自一家蘿梯夜碾七香車舉頭雨過餘霞散綠芰

池開菡萏花

積翠  
峯

仰攀日月風雲近俯瞰岡巒培塿低絕頂光芒長不斷人言

太白此中棲

太白峯以上  
宋詩紀事

追和子由洛下所寄五首之一

蘇軾

洛邑從來天地中嵩高蒼翠北邙紅風流耆舊消磨盡只有

青山對病翁

公自注謂富  
公也東坡集

詩八

至洛

宗澤

都人士女各紛華列肆飛樓事事嘉政恐皇都無此致萬家

流水一城花

忠簡集

同劉元靜遊嵩山峻極中院作

王宋

爛紅一點出浮漚夜坐嵩峯頂上頭笑對僧窗談祖德當年

七十四回遊

風月堂詩話

懷洛陽舊居

朱敦儒

青羅包髻白行纏不是凡人不是仙家在洛陽城裏任卧吹

銅笛過伊川

澄懷錄

田橫墓

嬾雲

荒冢臨岐尚隱然春風吹綠草芊芊牧兒亂唱黃昏後猶似

悲歌薤露篇

懷洛陽舊園

余知閣

洛邑名園歌舞沈亂鴉啼破幾深林何人學得香山老千載

精廬有梵音

以上宋詩紀事

金

敬母石同裕之賦

雷淵

千古崩崖一罅開強將神怪前郊祿無情頑石猶貽謗貝錦

從爲巷伯哀

少室道中

許安仁

少室峯頭曉月沈  
千家城郭淡陰陰  
五更雞唱殘星滅  
馬上看山過少林

望少室

許安仁

名山都不見真形  
萬仞盤盤入杳冥  
安得雲間騎白鶴  
下看三十六峯青

被召過少室

許古

老病無堪合退休  
伊川久已得菟裘  
如今又上長安道  
好破青日笑白頭

玉華谷同希顏裕之分韻得秋字

李獻能

玉龍落峽噴飛流  
空翠霏霏晚不收  
歇脚山堂一壺酒  
暮涼

閑對兩峯秋

少室山卓劍峯

秦畧

神威洗盡世間讐  
電歇雷歇怒氣收  
一柄太阿留少室  
却擎空掌華山頭

送裕之往洛陽兼簡孫伯英

劉昂霄

洛水嵩山壽樂堂  
每從熱惱得清涼  
竹牀石枕應無恙  
尚可分風供十方

啟母石

元好問

書載塗山世共知  
誰傳頑石使人疑  
可憐少室老突兀  
也被人呼作阿姨

三鄉雜詩三首

元好問

夢寐滄洲汗漫游西風安得釣魚舟薄雲樓閣猶烘暑細雨  
林塘已帶秋

尖新秋意晚晴中六尺筇枝滿袖風草合斷橋通暗綠竹搖  
殘照漏疎紅

溪南老子坐詩窮窮到簞瓢更屢空五鳳樓頭無手段碧雞  
坊外有家風

杏雪亭雜咏

元好問

洛陽城闕遍灰烟暮號朝虞只眼前為向杏梁雙燕道營巢  
處處過明年以上中州集

裴公亭

鄜權

十里蓮塘際碧山入潭無數竹根泉詩狂欲灑亭間壁却媿  
文公與樂天

龍門

徐好問

疏鑿而來道路通行人萬古翠微中南山山寺題詩滿一字  
何曾到禹功

過洛陽

薛繼先

西來東去洛陽城千尺浮圖了送迎十日酒旗歌板地白頭  
孤客可憐生

題御城市壁

劉著

一徑埋雲草樹荒石麟蒼蘚卧田桑漢家陵闕今何在洛水

嵩山滿夕陽以上中州集

過嵩山

辛愿

催老年光滾滾來好懷知欲向誰開箕山潁水春風裏呼起

巢由共一杯嵩書

元

綠珠

宋旻

紅粉折身為主家明珠一斛委塵沙年年金谷園中燕銜取

香泥葬落花翠寒集

狄梁公墓

完顏綱

神器旁遺幾不留曾將忠義破陰謀淡烟衰草平林月猶帶

當年帝子愁

洛中

馬祖常

龍門三月洛波清正是花時過故京樽酒不來芳樹遠碧雲

初合暮山橫石田集

登北邙山

楊果

干戈叢裏過壬辰原上纍纍冢墓新寒食清明幾家哭問來

都是陣亡人

魏家池館姚家宅佳卉而今采作薪水北水南三二月舊時

多少看花人西菴集

送緱山侯氏宅

李孝先

海東月明九萬里照見山頭白鶴還竹几匡床清似雪不知

門外是緱山五峯集

盧鴻嵩山草堂圖

吳鎮

盧鴻仙去五百載一段高風未可攀忽覩草堂清絕處分明

几案有嵩山梅花菴彙

少林寺

崔伯淵

初祖恩恩東向來心中已覺五花開要知面壁九年意立雪  
齊腰心不迴

禪宗一派自西來五葉花枝從此開僧伴白雲無箇事香烟

朝暮鎖青苔

宿少林

史鐫

過客東來宿少林山僧禪榻冷雲深天風驚覺三更夢松杪

秋聲響玉琴以上少林志

明

贈荅祿與權山居

宋濂

紅鞋金帶荔枝花三品詞林內相家歸去山中無俗事瓦瓶

春水自煎茶

乞與山童潤筆錢歸時正及早春先玉堂分取薇花樹種在

雙溪淺水邊潛溪集



新歲洛陽遇張公

方孝孺

懷鄉戀闕兩茫然回首江南路八千今日堪悲復堪喜洛陽

城裏度新年

遜志齋集

北邙山

薛瑄

北邙山上朔風生新冢纍纍舊冢平富貴只今何處是斷碑

零碎野人耕

秋日過洛陽

薛瑄

洛陽城西今又來颯颯秋風吹客懷禾黍荆榛蛩韻切昔人曾此起樓臺

鞏洛道中

薛瑄

高高雲氣晚嵯峨清洛西風咽急波水色山光渾似舊漢家

陵墓夕陽多

以上文清集

新安謠三首

李昌祺

新安野老髮垂肩說著先朝淚泫然洪武初年真少事幾會輕到縣衙前

垂老頽逢歲薄收秋租多欠賣耕牛縣官不暇憐飢餒喚拽

官車上陝州

當夫當匠子孫亡田地荒蕪戶有糧昨日迤西蕃使過盡驅婦女遊牛羊

宜陽道中

李昌祺

綠陰重疊鳥間關野棗花香宿雨殘天遣浮雲都捲盡教人  
一路看青山

嵩縣遇端午

李昌祺

老大偏多故里心一逢佳節一沾襟誰知此日菖蒲酒又在

山城獨自斟

以上容  
膝軒州

過孟津

張瑄

停車未渡立沙頭歷代豪華逐水流天命人心歸有德不須

期約會諸侯

明詩  
存

君子亭

陳棐

昔年曾此竹亭過峙對琅玕發嘯歌今夕向予蓬鬢舞清陰

更比舊時多

文淵  
集

三祖菴

王尚綱

太室山坳一徑橫茅菴勢倚碧崢嶸叢林好語聞啼鳥猶似

當年萬歲聲

蒼谷  
集

題澹然庵

孟化鯉

灑洛交流鎖紺扉層城秋暮四山圍一庵特地靈金粟優鉢

雲高澹澹飛

雲浦  
集

九龍潭

高出

空門漠漠白雲還雲外春潭鏡裏山獨有鉢龍眠不穩時來

行雨到人閒

盧巖瀑布

高出

太室東來第幾峰孤巖側削半芙蓉為看飛瀑三千尺直透  
春雲一萬重

御砦

高出

明霞掩映御帷深想像鸞輿不可尋少室千年山色在  
看人寂寂古還今

御砦

秦槐

獨樹祇園歷歲華根柯百畝影龍蛇遊人多作三生夢  
時逐旃檀落細花

望嵩少

袁宏道

客程行盡太行山又見嵩高紫翠間料得有人山上笑  
紅塵似海沒朱顏

望箕山許由冢

文翔鳳

豁眼靈熊見峻箕懷人月到潁川時知君尚厭佳名在肯聽  
嵩陽弔古詩太僕集

澗池有懷

傅梅

會盟壇下澗池流草色連天蔽故邱隴月只看懸太白秦雲  
不解到幽州雒園稿

三月十九日行次嵩山會善寺

顧絳

獨抱遺弓望玉京白頭荒野淚霑纓霜姿尚似嵩山栢舊日

聞呼萬歲聲亭林集

金谷園

宋碩燦

花落樓空委翠塵千秋明月恨長新西風原上羣芳歇獨有

芙蓉似美人洛陽志

國朝

漢栢

王紫綬

三樹中天倚翠微霜皮寧論幾人圍徘徊欲問東封事落日  
幾霞帶雁飛

何處鐘聲度晚廳蒼烟荒草龍螭武皇雨露恩原厚嶺上

以漢時知恩堂集

會盟臺二首

王士正

秦聲趙瑟會西河御史前書較孰多臨訣數言關大計論功  
終欲首廉頗  
不辭頸血濺秦王進任當筵氣慨慷十五名城酬趙壁何如  
談笑請咸陽

新函谷關

王士正

建瓴形勢壓河潼六國逡巡百二雄楊僕移來定何事妬他  
昭屈在關中

洛陽

王士正

國本爭來黨錮連楚歌楚舞亦堪憐如何鴻鵠高飛去又見

蒼鵝出地年

望龍門香山寺懷白傳

王士正

神女浦前眉月上窈娘堤畔臉波橫輸他六十河南尹五度

香山雪後行

白詩五望  
香山雪

洛神

王士正

凌波羅襪欲生塵賦裏驚鴻態尚新不信三臺燈火夜針神

真比洛川神

洛川南望

王士正

碧嵩清洛洗愁顏伊闕中分兩髻鬟煖翠浮嵐看不盡緱山  
南是伏牛山

白馬寺

王士正

伽藍半化洛陽塵漢代鴻臚跡尚新太息他年窮楚獄仁祠

空解祀金人

王輔嗣冢

王士正

鍾會齊名果是非白楊孤冢文煙微如何一夕談名理不救

河橋誤陸機

緱氏縣

今偃  
師

王士正

白茅授印事何如底許孫卿更上書桂觀蜚廉人力竭祇緣

仙子好樓居

宋陵

王士正

洛水卽山飽廢興宋家幽寢闕魚燈奉香不見臨安使白日  
茫茫下七陵

田橫客墓

王士正

一劍縱橫百戰身楚雖三戶竟亡秦拔山力盡虞兮死爭及  
田橫五百人以上漁洋山人集

遊嵩山寺

鄭日奎

十里溪聲五里山數椽梵刹萬松間老僧掃地不爲客待有  
白雲時往還通志

緱山廟

蘭挺偉

古木森森靄鬱華碧雲峰頂見仙家玉簫吹斷人何處一片

秋聲送晚霞

續通志

金谷園

武攀龍

名園渺渺水悠悠柳色花香滿陌頭不是東風吹不散春光  
尚覓石家樓通志

天津橋

潘耒

天津橋畔水粼粼桂楫香車競上春何處蜀鷓啼過耳行窩  
愁殺白頭人

洛神廟

潘耒

這端託興亦多辭賦筆寧當免帝姬賴是感甄人共曉洛神  
千古尚留祠

田橫墓二首

潘耒

齊甯寧甘作漢臣便邀封爵亦危身  
樹功將相猶菹醢何況同時逐鹿人

五百人同地下遊何如堅卧海東頭  
高帆大舶為徐市瀛島

何方不可留以上遂初堂集

洛中絕句

湯右曾

南北由來嗜好殊幽人風味不全孤  
玉川三百團團月一字

何曾道酪奴

庾郎鮭菜二十七嗤點何來李令公  
洛鯉伊魴非俊味白頭

韭出客盤中志稱洛韭至美果然

屠兒割肉妓兒繩敏捷當時甄李能  
何事江南老常侍只將

片石說韓陵

士馬并州劇亂麻爭宮堯率洗鉛華  
洛川多少興亡恨惆悵

年年楊白花

微君之故乃泥中婢亦知詩似鄭公  
不解雙聲定何語冠軍

家自有春風

南園池館久飛灰將相功名何有哉  
三十六峯雲雪路只應

招鶴更歸來裴晉公有南園靜興詩

子粒芒紅檢按頻兩京薄產事艱辛  
將書苦憶東屯老伊闕

年年有好春

香山寺裏留遺集  
盃酒何如身後名  
今日橋紅沙白路  
一篇長恨舊風情

龍門雪下有佳期  
車馬漸漸水上遲  
但使都廳遺事在  
未嫌歐尹不同時

破垣遺竈天王院  
陰雨元功剩幾家  
歌管層層春處處  
夢中猶看洛陽花

懷清堂集

西厓視學中州重修龍門香山寺後一年汪退谷以事入秦過洛中命王僧種松數百株因繪成橫卷兩公往復之作在焉索余繼和四首

查慎行

俸薄官清舉廢難  
種松初返舊時觀  
風流二老知誰繼  
畫裏

亭臺補復完

甲子俄驚十五周  
剎那滅劫已千秋

自開成踰十五

六年至今甲子矣

多情

八節灘頭水重挾  
松聲上石樓

曾否經堂認寫真  
却將綺語懺前塵  
他時編入支提藏  
莫忘

題詩第四人

兩公倡和而外惟索西谷及余詩故云

夢裏曾遊亦勝緣  
叩門南去是伊川  
打鐘掃地初心在  
終著

袈裟喚渡船

敬業堂集

洛陽雜詠

呂履恒

建春門外舊皇家  
避暑宮前響翠華  
四十年來人不識  
春風吹徧野園花



元公遺廟暮秋時古木悲風向晚吹駐馬塵塗還泣拜遺民  
新立尚書碑先忠節罵賊死節處

召伯巡行有舊風欲尋遺蹟燧煙空那知南國甘棠舍還望

東周離黍宮甘棠古根廢於寇燹

鞏邑東來淨路塵子陵祠畔正芳春客星不與炎灰滅分代

流風賴故人

金谷園中萬馬嘶綠珠樓上數行啼可憐歌舞招奴輩能使

皇輿不再西

煙冷平泉憶舊莊園林爭重似門牆東都已改西京破醒石

依然夢贊皇夢月巖集

許由冢

呂履恒

青山頂上一孤邱俯視陶唐十二州偶使人間知姓字遂教

潁水宛清流別裁集

題香山圖和湯少宰韻四首

汪士鉉

聽說松栽已滿山綠烟杳渺白雲間佗時入節澗邊路定有

清陰十畝閒

早向深山學養病豈知平地有風波而今伊闕干龕裏布襪

青鞋好再過

昨日身過瀑水巖便將心事托長鏡忽看畫裏香山寺兩處

題名選石嵌

君依丹闕留仙境我向香山續昔遊  
準備紗籠舊題處待公霖雨慰窮愁

退谷集

裴宏墓

偃師

呂謙恒

河橋冰泮石鱗鱗冷日荒塚感路人  
此地幾年埋碧血至今

楊柳不成春

青要集

王輔嗣墓

全 軌

半泓荒墳碧草春交枝均栢盡龍鱗  
世間刺刺聽殊厭才鬼

清談最可人

杜工部宅

全 軌

故宅河山跡已沈青臺白榜登臨宋公池  
館無人問天地

長留一飯心

以上真志堂集

偃師迎春

盧道悅

律轉鴻鈞佳氣同肩摩轂擊樂融融  
不須迎向東郊去春在

千門萬戶中

別裁集

望嵩山

呂守曾

三十六峯如髻鬢行人來往舒心顏  
白雲蓬蓬忽然合都在

虛無縹緲間

別裁集

南齊志卷之三  
三

